

# سٲا اُونطه هاتوا قلوبنا

خالء سعٲء

# جميع حقوق الطبع و النشر محفوظة

الطبعة الأولى يناير ٢٠٢٠

---

الكتاب : سيما أونطه هاتوا قلوبنا

المؤلف : خالد سعيد

تدقيق لغوي : هدير محمود

تصميم الغلاف : محمد درباله

رقم إيداع : ٢٧٩٢٣ - ٢٠١٩

ترقيم دولي : ١ - ٥ - ٨٥٦٣٣ - ٩٧٧ - ٩٧٨

---

دار مسار للنشر و التوزيع



01020439639



massar.pub1@gmail.com



ش - حسن خطاب - قسم يوسف بيك  
- الزقازيق - الشرقية



خالد سعيد

سيما أونظه هاتوا قلوبنا



**مسار**  
للنشر و التوزيع



إهداء  
بسملة ومحمد  
أمنا الغولة أخذتكم وراحت  
أمنا الغولة أعلنتكم  
آخر ضحاياها ف..  
ارتاحت!  
أما أنا ف..  
الله يرحمني  
ويشبهش الأفيش.  
خالد ،

## قبل فتح الستار

أنا حد كلم حد  
في الذكريات والجاي  
فقبل بمعنى الرفض  
ومات وهو حي  
أنا حد يعرفني  
كأني شافني  
من شكل حد قديم  
أنا منه خاطفني !

## نشرة الأخبار

فيه حاجات  
كل السكات لو كان يقول  
كان قالها يوم  
بس طال فيها الكلام  
فبقى وجودها

مالهوش لزوم!  
فيه حاجات في غيابها كانت حاضرة  
وفي حضورها  
غيابها بقى شيء محتوم !

## الفيلم الكارتون العشر دقائق

لعشاق الشعر ١٠ دواوين  
وللعشاق محبة في الفتارين  
وبياع الورد جوا الترب  
على الكورنيش  
يبيعهولك مع البلاين  
كطقس للحب بزيادة  
فعل فاضح إكمنه  
بقى في بيوتنا يا دوب عادة  
هتحب يبقى يا حلو تقب  
بذهب ودولاب وسجادة !

سيما صيفي سقفها سحابة بتشتي

## أفیش

اللي حابه والمحبة  
واللي كانوا معايا حبه  
وذكريات على قلبي طبة  
ماسكة فيه مسكة شاویش  
جاية فيا بتستخبي  
جاية بتصحي المحبة  
والسنين حاجة بنت قحبة  
تخطف العمر في مفيش  
آن أوانك ياللي طبت  
سوق نخاسة وفيه سكرت  
كسبت فيه إيه لما بعت  
وبعت إيه فبقيت مفيش  
بس يعني أن أوانك  
والفراولة لونت طعم الشفايف  
وانت لسه يعني نفسك  
بس إوعى تقولي خايف  
بنت حلوة تحضن الواد ع الأفیش !

## سيما

البطلة كانت حلم  
قابلت أمير مسحور  
والقصة كت للعلم  
كاس ع الجميع بيدور  
قصة فراق بأسباب  
أو حتى من غير سبب  
كل القلوب أحباب  
وقت الفراق تتغلب  
في إيقاع من الأحداث  
ودراما مهروسة  
على دمعتين وعتاب  
من بعد كام بوسة  
يتفك سحر البطل  
فيشوف عماه في الفراق  
ويشارك الجمهور  
في السيما بعد الفيلم  
لازم يقيدوا النور !

## في الفراق

هادوا بعض في الفراق  
بقلوب بتعشق حبها  
مش كل حاجة في الفراق  
كت نار بتاكل بعضها  
ولا انتوا كنتوا حتى دور  
من سيناريو أو قصيدة  
احضنوا بين السطور  
شوفوا فرحة تكون جديدة  
ولو النهاية جت فراق  
في حزنها هتكون سعيدة !

## زي السيما

زي السيما  
البطلة بتمسك في إيديا  
وتقول آسفة  
استنى شوية

وتحكي لي  
عن بعد وسهد وفراق طول  
وتقول ندمانة  
ومش قادرة في بعدي أكمل  
وأنا بحضنها  
وتنزل تترات الأغنية  
زي السيما  
آسف جدا أنا بتخيل !

## بطلة فيلم

وكبطلة فيلم  
ظهرت والمشهد  
بقي شبه الحلم  
قربت أنا ليها  
علشان أتأكد  
إن ده كان علم  
وإنها هتميل  
وهميل وياها فهتسلم  
هتبص بنظرة

فأرد ببسمة وهتكلم  
وأرسم قلبي  
فهترسم سهمها بيعلم  
ومشاهد بتعدي ما بينا  
وتتر نهاية  
بموسيقى حزينة بتتألم  
وما دُقتش  
من عسلي معاها  
غير طعم السم !

## دفا وفرح

خشب الشبايبك القديمة  
بكلور ومطرة  
تغسل خريف الذكريات  
البرد فيا كارهني وحدي  
بينادي بكره  
ويقولي سيبك م اللي فات  
احضن محبة دفاك خلقلك  
أيام تعيشها فتموت قديمة

ادخل وعيش الفيلم فيها  
حكايات كثيرة م الدنيا سيما  
دفا وفرح وروايات  
وانت ليه وحدك في شباك المطر  
عقرب وقف في الساعة  
قولت الوقت فات؟!  
داري دموعك في المطر  
واضحك وقول الدنيا عيد  
شوف كل شئ عشته وفهمته  
مخلوق جديد  
الفرح يجي لما حزنك  
يزهق يعيد  
الفرح بنت كانت قمر  
واقفة في شباكك معاك  
بتدفي قلبك في المطر  
وتلون الشبابيك بلونها  
وتقول عيونها أنا محتاجاك!

آخر صف

لكل حد تاه مني  
عشان شافني في يوم زحمة  
وشاف نفسه في آخر صف  
فقرر فجأة يبقى مفيش  
ويبقى هدية فوق الرف  
أنا آسف عشان معيش  
كلام بيحب فيه الناس  
وبسكت لما مبغنيش  
وأقول الفرحة جت وخلص  
أنا بطبعي بميل للحزن  
وأمل اللحن  
وألم السر في الحكايات  
وأبات آخذ خيالها في حزن  
قديم جدا  
بحب الحب ذات نفسه  
وأشوف الصعب دايماً سهل  
وبسأل وقت ما بناقش  
ومسألتش بحكم الجهل  
أنا القوة اللي جت فيا  
في وقت فراقكم فكنتم ضعف !

## بتودع ماضي

كل الأبطال عايشين  
في القصة وفي الحكايات  
والذكرى بقالها سنين  
عايشة كدليل إثبات  
إنك بتودع ماضي  
فتعيشه أكثر من الأول  
وإنك مش قادر تنسى  
لو حتى غيابهم طول  
كل الحكايات والقصة  
بتعيش جواهرهم لسه  
من بعد ما قلبك مات !

## أبطال سيما

بتزيد في خدوش  
وترجع من تاني وتطلينا  
مكياج كداب لأبطال سيما

وتدينا وشوش  
فرحها مرسوم  
ومقسومها تموت في التقسيمة  
وسيناريو حوار  
مكتوب نختر كل المكتوب  
ونعيش القسمة والمقدور  
نخرج عن نصنا أحياناً  
لكن هنمثل نفس الدور  
فنعيد تجديد قصة قديمة !

## جوه الشاشة

أنا فيلم كوميدي  
ضحكت عليا عيونها بمحبة  
ولاً رومانسي  
سلاها وقت ما فضت حبه  
عيل وزمان دائماً بسأل  
أبطال الفيلم  
عارفينها قصة بتتمثل؟  
فاهمين إن القصة إن طالت

بمؤلف شاطر  
ممکن تتحول لمسلسل؟  
في مرارة كل النهايات  
بدايات حكايات فرحها أجمل  
بتاخذنا معها من الأول  
م أنا طول عمري جوا الشاشة  
عايش حكاياتها  
لكن جمهوري بيتبدل !

## المطرح

في المطرح.. قلبي طارح  
الحكايات القديمة  
ذكرياته شغل سيما  
شاف عيونك  
لما كنتي معاه ليلاتي  
وفاق على فراقك ففقت  
مملكتهش أكره ما دام عشقت  
في الأماكن بينا حاجة

فيها منك.. منها ريحتك  
فيها تعبي وفيها راحتك  
فيها ذكرى عايشة لسه  
موت هوايا بغدر جرحك  
كل حاجة بينا باقية  
إلا انت الله يسامحك!

## مونتاچ

وبالمونتاچ يتم العرض  
فتطلع أحلى حدوتة  
تشيل وجعك من القصة  
تخلي منه فتفوتة  
وتخلق نصرك الوهمي  
على وجعك  
تقصص كام محاولة ليك  
عشان صورتك تكون حلوة  
تبروز جوه دور الشر من خدعك  
وتظهر نفسك الآخر  
بطل في القصة والغنوة

وفي الأول تخلي بداية القصة  
كما كنت بتتمنى  
وتنهيها بفوق ما كنت تتمنى  
كأنك كل يوم عايش  
مراسم حلم في الجنة  
فبالمونتاج  
حاولت تخلي اللي فات  
في دار العرض  
بيان أوقات بشكل أفضل  
وتبقى حياتك  
مش لفاترينة مشاهد العرض  
ففي السر تعيش جواك  
وفي السر معاك تفضل!

## تمت الترجمة

بقيت بتابعني زي الفيلم  
وبتفرج على نصه  
وبتأثر عشان مبكيش  
بقيت بقفلني من نصه

وأعيّشني في دور تافه  
وأخلق قصة وهمية  
وبحميني كما الأوطان  
مع إن حماتها حرامية  
فبسرقة فرحة من حزني  
وبتمنى ملاك من السما  
معايا تكمل الفرجة  
وتكتب تمت الترجمة!

فيلم  
البحار والسبع بحار  
اللي ما بتبحرش

## كوخ المطر

على حذر  
تقربيلي قضا وقدر  
وتسكنيني  
ما أنا كوخ رماني البحر ليكي  
وانت كما عصفور بله المطر  
جه فيا يدفا  
كمراكبي شاف غرقه  
فوجه الدفة  
لشط كنت أنا فيه  
عصفور سنين بناديه  
معرفش إن الكوخ  
أنا اللي كنت بانيه  
وأنا اللي لجل عينيه  
فكيت خشب مركبي  
وبنيتها كوخ في المطر  
كان لجل ما تقربي!

## نهايات الغرام

نهايات الغرام واحدة  
ووحدة كأنها نهاية  
حكايات فينا متشالة  
ومتقالة في ذكرى  
يوماتي تحكينا لنفسينا  
فنفرح لما نعيش فرحة  
من الذكرى  
ونحزن من فرحها فينا  
قدر خلانا نختار  
كل شئ مقدور  
فكنا فراش  
بيفرح لما بيتحرق بالنور  
وكنا فين  
لما المركبة بعدت  
عن الشط ومراسينا  
وبقينا ألف حدوة  
نهايات الغرام واحدة

نهاية بدون ولا نهاية!

## شراع

فارد دراعي للسما  
كما شراع قارب  
مسلم نفسه لقلب الريح  
وسايب حبله ع الغارب  
تعب وتعبت  
بقيت متساب  
وعمري ما سبت  
ومش فارقة  
يا عيش غرقان  
يا أموت قابب !

## سيرة البحار

كل حاجة بتجبرك  
فملكش حق الاختيار  
مُسِير

بتبص للسما ليه بلوم  
طول ما في ظلم  
الحق ع المظلوم  
إزاي تآمن وقت كفر  
وإزاي تأجل لحظة الانهيار  
الوقعة بتموت مبتقويش  
والقومة من بعدها  
معافرة مش أكثر  
الوقت ساكت فيك مبيعديش  
ومع كل ثانية وصلت متأخر  
هتتعدل والأمل والحياة  
كلمات لعشمك بعدها بتسخر  
غريق فبتكتب سيرة البحار!

سيرة الولد اللي بقى شايب  
بره تترات الفيلم  
وبنت الك.. وتشينة

## كوتشينة

- تلعبى كوتشينة؟
- ألعب.. بس اللي انت اللي بجد هتتعب
- أتعب ؟ طاب ليه ؟
- تختار دور إيه؟ الواد ولا الشايب؟
- أنا دايمًا بشتاق للأصعب
- انت اللي اخترت
- وده آخر حاجة ممكن تختارها
- وده آخر حاجة هتملك انك تخسرها!

## توت

- تذكرة وحضن المحطة
- والشتا وصوت أكورديون
- وناس بتبيع حاجات بايته
- وناس بايته
- وناس صابحة

وناس راجعة وناس فايتته  
وصوت الفجر بياذن  
يغير في السما واللون  
وريحة الحزن بتخطفني  
من المشهد  
أبص في عينها وأستشهد  
وأشهد  
في صوت القطر دقت التوت  
- بحبك خد بقى بالك  
وأنا يعني في هواي يموت !

## ومعايا وجنبي

ومعايا وجنبي ده لو تقدر  
على وعد واسمه المتقدر  
لو تبعد أنا مش راح ألومك  
لو تفضل جنبي أنا مقدر  
ده في قربك مني بتوحشني  
وفي بعدك جنبي بقى تصور  
وبنادي عليك ياللي واحشني

في حروف اسمك ده بدوق سكر  
من نظرة منك تحيني  
وهموت لو مرة هتستكتر  
على قلبي انه يحضن قلبك  
ويحبك فوق ما هتتصور  
فحبك والحب ده يشهد  
كذب إحسائي ده لو تقدر  
أو صدق إحسائي وقولي  
حبيتك .. مش لسه هفكر!

## عن الفراق والموت

ليلة الفراق الأولى  
هتشد في سيجارة  
تاخذ يادوب نفسين وتطفيها  
صداع؟ ده ولا مش صداع؟  
هتبتسم وانت بتفتكرله ذكرى حلوة  
وهتبتسم وانت بتقول يلا أهو باع  
وهتتقسم لاتنين  
كل واحد كاره الثاني

واحد يللمم اللي باقي منك  
وواحد يقول ما تحاول معاه تاني  
وبعدها هتحاول تبقى نشاذ للإيقاع  
إيقاع إنه معاك في أكلك وشربك ونومك  
وفرحك ولبسك  
وبرفانه في هدومك بقى عادة  
إيقاع إنك تشوف نفسك في عينه حلو بزيادة  
وإنك تدندن أغنية كان بيحبها بصوتك  
فتغني أغنية عن الفراق والموت  
وتشرب عليك قهوتك سادة  
ليلة الفراق الأولى مش زي يوم القيامة  
لا بعدها قومة ولا حساب بيودي جنة ونار  
يا دوب تموت وملكش حق الاختيار  
بعدها هتحاول تعيش تاني  
وتبدأ في قصة أحداثها متعادة!

## خربشيني

خربشيني تلاقى منك  
صورة تانية جوا مني

هاتي حضني للمخدة  
واسألينه طاب مين حضني  
وارسميني لما نظرة  
من عنيني تسرقني مني  
قولي سحراه من هوايا  
قولي حلوة قصايداه لكن  
كلها كانت معايا  
كان يا دوب يقابلني ساعة  
ويجي يحكي دي الحكاية  
أيوة أنا حزنه وفرحه  
حتى يعني وقت جرحه  
كنت أنا سبب النهاية  
حبني كما ألف واحدة  
شافني من كل الزوايا  
وبعد مني عاش في وحدة  
كنت أنا اللي بمص دمه  
ويجي فيا يداري همه  
كنت أنا خوفه من أمه  
وكنت أمه  
حضن بيكفر خطاياها

لما كانت يوم معايا  
أيوة أنا اللي ريحتي فيه  
وفي سجايه  
وفي فناجين قهوته  
وقت سهره  
أيوة أنا يوم نصرته  
أيوة أنا في يوم كنت قهره  
أيوة أنا صاحبة ديوانه  
والدواوين اللي جاية  
حية فيه من بعد موته  
وفي سكوته  
ووقت موته أنا كنت حية  
واسألوه إن كان يجاوب  
غيري مين في الدنيا شايف  
وقتها هيجري لحضني  
أصله مني جالي خايف !

نهاية

هو ليه الحب لحظة

وبعدها ميت بعيش  
فيه نهايات للحكاوي  
بعدها ما بتتحكيش  
والنهاية  
لما جيتي تودعيني  
ومشنقة كفك بتحضن  
رعشة البرد في رقبتني  
كنت مستغرب وشايفك  
سارقة من خلقي نهايتني  
كنت مستغرب شفايفك  
اللي وعدت في البداية  
واللي نطقت بالفراق  
لما ودعت في النهاية  
كنت جوه مني فاضي  
مش لاقيني  
كنت برسم بسمه بهتانه  
فيها ندم العمر كله  
ع اللي فات م العمر ليكي  
كنت شايف نفسي لعبه  
بين ايدين طفلة بتعلن

إنها كبرت خلاص  
وإن روج شفایفها قرر  
يمشي فجأة  
ع اللي كان مكتوب ما بينا  
ولسه بالقلم الرصاص  
وإن برفانها بيعلن  
بالقرار المملكي أنثى  
وإن أي حاجة لسه  
بتحس بيها بتقولي أنسى  
المليكة للجميع  
المليكة لما توفي  
فجأة بتقرر تبيع  
المليكة صورة كاملة  
لما يكتمل الربيع  
واني يعني  
لسه عايش في الخريف  
وكوني لسه بحن تعني  
إن أنا إنسان ضعيف  
المليكة بقت في أحلام الجميع  
بس عندي بقت أقل من مفيش!

## وقت

بعد السكوت سنوات  
يصحى الي عدى وفات  
مارد من القمقم  
في ذكرى الفراق بتدوق  
من بعد طعم الشوق  
طعم العسل علقم  
فتصلي للنسيان  
وتكفر فتبقى جبان  
وللذكرى تستسلم  
نظرة عنيتها  
وهي بتغرس قلبها في حزنك  
على السلم  
رعشة ايديها في السلام  
عليك لما بتسلم  
نفضة من جواك  
لما بتقولك بحبك وربنا يعلم  
تلقاك مع الذكرى كده اتوحدت

وكأنك عايش زمان دلوقت  
وبتحلم ف نفس الحلم من تاني  
وتقول لو مرة قابلتها تاني  
ولما تفوق على جرحها تندم  
أصل النهاية  
مكتوبة من وقت لما بدأت !

## النصيب

النصيب  
كلمة بيها بتبتي كل القصص  
هو مين كان يعني عارف  
إنه بيقالي قريب  
وإني أفرح جنب منه  
وإني ألقى قلبي جوه حزن قلبه  
لما أشواقنا يحنوا  
وإني أعلن جوه مني  
إن ده آخر حبيب  
والنصيب  
كلمة بيها بتنتهي كل القصص

قفل باب الذكريات  
والدموع هي الحرس  
كل شئ قسمة ونصيب  
فلما وعدت قلبي مرة  
قلت ده هو النصيب  
والنصيب أنا عشته وحدي  
في طبطة كف الغريب!

## قميص يوسف

وقتها .. قفلت كل البيان  
وفتحلي بابها وعشمتني بقرب  
فرشتلي جنة وردھا  
ومشيت معاها ونور عنيا الدرب  
تاهت خطايا بين الطريق والطريقة  
غمت عنيا عن الخطايا  
وقولت لأهي البريئة  
هي الحبيبة لما انكتبلي أحبها  
ووقت لما أحتاها واشتقالها  
بتكون رفيقة

وأنا مش نبي  
أنا أصل قلبي كان غبي  
لما رماني في حضنها  
وفوقني على مليون حقيقة  
والحقيقة زي نور أعمى خطف عنيا  
وغلبني لما هربت لقلبها  
من غلبي لقيته هو الغلب  
ورجعت وحدي للي قالوا مش نصيبك  
وصعبت على نفسي  
لما لقيت رجوعنا الصعب  
فهدق بابهم زي الشحاتين وأجي  
بقميص ليوسف وأدعي بالكذب  
إن اللي قتل الحب هو الحب  
وإنك بريئة من كل وجع القلب!

## الحاوي

عارفة لو كان الفراق  
في يوم مجاش  
وانت جيتي وقولتي لا مهانش عليا

وكنت صدقتك  
والحقيقة معشتهاش  
كان زمانك لسه جوا قلبي حية  
عارفة من بعد الفراق  
ابتديت اشوف حاجات ما شوفتهاش  
ابتديت اشوف الدنيا.. دنيا تانية  
دنيا فيها قلبي حاوي  
لسه بيحاول يعيش  
والحكاية مش براءة  
الحكاية يا مين يعيش  
الحكاية إن سمك  
جوه قلبي إداه جراءة  
فالي مات قرر يعيش  
والي عاش من بعد منك  
يبقى حاوي  
يبقى قابل ألف حية  
يبقى شافهم صورة منك  
وانت صورة ما تتنسيش  
وألف تسقيفة  
م الي شافوا اللعبة مني

واللي ماعرفوش حكايتك  
م الحكاية ما تتحكيش  
مين هيعرف بس منهم  
إن بكرة كان معاي  
وبيكي قرر ما يجنيش  
مين هيعرف إن قلبي لسه غاوي  
مين هيعرف إنك جوا منه حية  
م في قصص الحب كنت الحاوي  
وفي حبك حاوي هويت حية!

## فرکش

فرکش  
من بعد كمال الصورة  
جمع  
نفسك من بعد الحلم أما اتفتفت  
افتكر إن الصورة كانت لاتنين  
قبل ما واحد يبقى مودع  
افتكر المشهد ميت مرة  
افتكر إن الصورة هتخفت

وهترجع وحدك وتجمع  
وتسف الوقت المستقطع  
وتدور على تاني تاني  
لو قال الأول مش هرجع  
وتلاقي التاني مع الأول  
ووحدة في طريقك تتلفت  
فده ودع وده قال مش هرجع  
ومتفرکش بيجمع ميت !

## كمان مرة

لاموني الناس  
قالولي بعد البعد  
رفضت تلومها لو مرة  
وكتبت كتير  
عن العشق اللي في عنيتها  
ولما جت تعودلك تاني  
قدرت لقربها تكره  
فيبقى إزاي بتعشقها  
ويجي القرب فتعاني

وتبعد عنها من تاني  
ومش عارفين  
بأنها لما قابلتني  
عشقها القلب من نظرة  
ولما جاتي بتودع  
عرفت قلبها الظالم  
هيظلمني وإيه يعني  
وهيظلمها بالمرّة  
فصعبت عليا كثير  
وحبيتها كمان مرة  
ولما جاتي في الذكرى  
تهون وجعي من بكره  
حبيتها كمان مرة  
ولما جاتي ندمانة  
تنادي الفرح في لقانا  
لقيت قلبي فرح لما  
عرف إن المحبة حق  
وإن قلبها كان له  
في حياته يادوب عبرة  
فحبيتها كمان مرة

يشوفوا بقى  
في البعد كام مرة حبيتها  
وأنا في القرب  
ما حبتهاش غير مرة !

## تذاكر مترو

كتبت كتير  
عن العشق وعن العشاق  
وسيت قصيدة خفت إني أكتبها  
هربت كتير وخبيتها في قلبي سنين  
لكن كانت بتيجي أوقات  
في كل حاجة بكتبها  
فروض يومي خمس صلوات  
ومشوار إني أروحها على بيتها  
تذاكر مترو من الجامعة  
ومر اليوم والساعة بقت خمسة  
وحضن المترو في الزحمة  
وعيني في عينك بتقولك  
أنا للوعد مش بنسى

وأيديا بتحميكي من الزحمة  
وأيديكي بتحييني من اللمسة  
تقوليلي بحبك موت  
وأقولك أنا أكثر أكيد حاسة  
وفي محطة بنتفرق  
أكيد من بكرة نتلاقي  
هكونلك وقتها مشتاق  
زي ما انت مشتاقه  
تروح وتغيب عن المشهد  
وأنا ببص في الساعة  
ما نقدرش نسيب بعض ولا ساعة  
تكلمني فتفضل ودني ع التليفون  
وصوتها بعيد في سماعه  
بتقولي بحبك موت وتوعدني  
هتقعد بكره جنبي في القاعة  
وهتحكيلي من تاني  
عن الواد اللي غار مني  
وتقولي بإن فلانة  
كانت عينها في يوم مني  
وأسرح فيها طول الوقت

وأفوق وأقولها فجأة  
إوعي تضيعي في يوم مني  
سنين ساكت .. وأهي ضاعت  
وسابت قلبي بيكرها بس حابها!

## لوحة

بنتجمع صدفة  
هربانة من الدنيا  
ونتهجى ملامح بعض نعشها  
ونلمح بعض في التفاصيل  
تدق قلوبنا جوانا  
يا واد لو ميلت راح أميل  
ينادي الفرحة للقانا  
وتنسانا ولو حبه آهات الليل  
وليل وياعين بقى غنانا  
عشقتك عشق  
كما عاشق عشق معشوق  
فكانت لوحة تطرزها  
إيد فنان في باب اللوق

على القهوة  
عنيكي بتحكي  
عن نار الفراق والشوق  
فيكتب كفي ما يكفي  
كلام موزون ومتصفي  
تغنيه فيكمل مشهد اللوحة  
وتتقسم تقاسيم الغنا تفرق  
فنتلاقى ويرجع قربنا يزهدق  
فنبعد نقول للبعد جرب دوق  
وأنا وانت وألف حاجة حوالينا  
لقا وفراق وحب وبعد  
وصد وعند بكفاية  
فيحترار رسمها منا  
ونحترار من رسمه لنهاية  
وتدلدق مشاريب كل من شربوا  
على اللوحة تغرقها !

حياة

عنيكي شباكين وحياة

وصورة حد وحشني وتاه  
كأني بتوب أنا فيهم  
فأبصلهم وأقول الله  
فأرجع ليا من تاني  
وأروح ليهم مجيش تاني  
وم الأول بكون عارف  
مليش بعدك حبيب تاني  
عنيكي حزنها ألوان  
وجرح بيوشم السجان  
وطيبة طفلة بتعيط  
وغيرة وشوق وشغل جنان  
تحن ليا تعاتبني  
تجيني لجل بتسيبني  
تحنيني بضيها يوم  
وتاني يوم تغلبني  
وأنا العاشق ويا ولداه!

عشق

يعجّز وصفها الوصاف

ده نظره منها رسمتني  
كأني كنت قبل الخلق  
وبس عنيتها أحييتني  
فمت أنا فيها من تاني  
لكن اللهفة صحتني  
عشان النظرة لو أولى  
ما هياش ذنب  
وعشان الحب لو قرب  
فداه القلب  
وعشان وقفها قدامي  
لكن والله وحشتني  
ده نظرة منها تتحدى  
قصيد ألف كتبتني  
وتعلن عشق جوايا  
قصيدني في وصفه خذلتني!

## لعبة يا نصيب

الحب نصيب  
والفرحة نصيب

وأشواق بتمليلنا المكاتيب  
وغناوي تصيب  
وحاجات بتورد خد البنت  
وتقول لأ عيب  
لعبة يا نصيب  
يا تخب يا تصيب  
شوفتيني يا أمي  
بقيت راجل وبقيت حبيب  
ملو هدومي وأد وعودي  
والوردة ده لايقة على عودي  
والحب منور في خدودي  
وزي ما نورت قومت طفيت  
الحب ده بهدلني معاها  
وشوفت الأعاجيب  
وبكاي من قلبي يعني قريب  
بس يقرب من عيني فيكون العيب  
ابنك راجل عمره ما بيظلم ولا يئلم  
وهسيبها إزاي وأنا متألم  
غلب المتساب يا أمي  
في إنه عمره ما بيسيب

بس القصة  
في حياتنا حاجات بتكون ناقصة  
فتكمل فتغيب !

## حليتك

أنا حليتك بكل قسايدي  
وخليتك تعيشي الحلم  
فاحلويتي بزيادة  
أنا النظرة اللي من عينك  
تشوف الكون فقطفها  
يطرح سعادة  
وأنا اللي بتتخلي عنه  
وفي القصة نده فينك  
وكان الرد  
بإني قصة من قصصك  
أو حدوته متعادة  
وإنك يعني سيباني  
في الحدوته بتمادى  
وإن الوقتي سيباني

عشان ما أزعش  
وتبات أحلامي مكسورة  
فطمني قلبك  
مفيش برواز بيتكسر  
عشان مجروح من الصورة!

## شقة المرج

يا شقة المرج  
يا شاهدة ع القصة  
لساكي متخبية  
مني في العناوين  
ولسه الحكايات  
والسر متفقين  
ويا باب معدي  
الصوت لسمع الجيران  
بالذمة مش واحشك  
آهات منها  
ويا كلمة منقوشة  
ما فوق الحيطان

حضاها من وقت  
ما كنت بحضنها  
يا كوبايات الشاي  
ما فوق الأرض  
لساكي فاكرة  
طعم شفايفها  
كتبت ألف قصيدة  
معرفتش أوصفها  
وتوهت بين الشوارع  
لجل أوصلك  
خبنتي منك قصايد  
لجل ما أكتبك  
وقالت ده مهما وصف  
يفضل بليد لسه!

## فزورة

ويعني كنت دايمًا أخاف  
إذا جيتي وحضنتيني  
وأقول لنفسى هعمل إيه

إذا الحب في قلبك قل  
تقولي بعشقتك جدا  
فأقولك وانت وحشتيني  
تقولي طاب منا في حضنك  
أقولك قلبي مش بيمل  
تقولي طاب وليه بتخاف  
أقولك قولي طاب من مين  
أنا خايف لنعشق بعض  
فنكره فينا من حبيننا وكانوا اتنين  
وأنا خايف نفارق بعض  
نعيش في الذكرى ناس تانيين  
يزيد العمر فيعني يقل  
يزيد الحب قلوبنا تمل  
يزيد الشوق نلقانا كده تايهين  
وكان الحب كان فوزة  
وفراقنا ده وحده الحل !

تزميلي

متأوليش رؤيتي

وما تحكيهاش للناس  
يا بسمه متشكلة  
بفرح وبكا ودموع  
الحلم لما يقع  
واقع في وقت وقوع  
وأنا رؤيتي كانت  
خالية من الموضوع  
بتشوف تملي الناس  
م الطيبة شفافين  
لا جيتي فيها في يوم  
ولا كنت فيها خشوع  
متدنسش رؤيتي  
أصلك يا دوب من طين  
والرؤيا مش حلم بيكي  
آخره سراب ورجوع  
تزميلي م الرؤيا  
ما شافش فيكي يقين  
يا دوب شوية زيف  
زايل بلون منقوع  
متحصنة بكذبك

ورواية الخائنين  
فطوعتي كل خراب  
رفض للشيطان الطوع!

## خايفك

وقت الحنين بيقابل الخذلان  
فيتصلب  
من كلمة كدابة بشفايفك  
فيرد ليا كره وأنا إنسان  
يعني لايمكن أكرهك  
ولا حتى أكون حبك  
كحد غريب كأني ماعرفتوش  
ولا حلمته بقيت شايفك  
وأنا زي ما انت كنتي خايفة  
وقت اللقا  
بقيت وقت الفراق خايفك!

## وقت الوداع

عنيكي وقت الوداع  
قالت كلام ليا  
ما حبتنيش ..  
وكان ردي عليها  
سكوتي في عنيا  
فهمت النظرة متأخر  
وما فهمتنيش  
بان القسوة من بعدك  
كانت مليانة حنية  
فبقدر ع الفراق بعدك  
وبقدر أعيش  
وندمت صحيح  
لكن على قلبي  
عشان جرحته بإديا !

## حكمها غياي

سابت غيابها معايا  
وثابت كعقرب ساعة  
مل فوقف من سكات

بيخاف يعيش في اللي فات  
ويخاف على حس اللي فات  
يدخل حكاية  
في وقت الفيلم كانت عينيا  
ما يهمهاش تعرف نهاية  
في وقت العلم  
بدأت كتير  
وماعرفتش فين البداية  
فبقيت وبالتدريج  
بحضر غيابها وغيابي  
في جريمة  
عقوبتها في قانون البعد  
الخوف من حد خونته  
لما وفيت بالوعد  
وحكمها غياي  
مضيت في كشوفات الغياب  
ده حضور  
ومكانش ذنبي  
إنك كظلمة بتكرهي في النور  
والديب برئ

في قصة ابن يعقوب لحد النهاية  
وحكم البراءة في منطوقه  
روح كل بقى الراعي  
هنأمنك ع الغنم  
ولو لقيت الفرخ روح غير المقدور!

## الخال

كل حاجة فارقة .. مفارقة  
وبنفس قدر الاهتمام  
راح توجعك وتودعك  
بنظرة وبكلمة سلام  
يا خال يا طيب  
ياللي جربت المحبة  
وبنيت على بيتك غية حمام  
مش كنت بس تقولي مرة  
إن المقابر مش بعيد  
وإن الحمام أوقات بيهجر  
بيته ويفارق بعيد  
وإن الكلام أوقات بيسكت

وقت ما بيقاش جديد  
مش كنت بس قولتلي  
ليه وقت حزنك  
كنت بترسم الابتسام  
ولا عشان أنا كنت عيل  
ما بشوفش غير الفرحة بعيني  
ولا عشان داريت عليا  
وخوفت حزني يجرحلي عيني  
ولا عشان كان كل حد  
وقت ما فارق  
رامي على الثاني الملام  
يا خال ياطيب  
سامعك بتضحك  
وتقولي يعني  
الكون ده كله هتحب فيه  
وتسيبه فجأة لما هتقرر تنام !

**متبعتر**

كن فيكون وشاء فيشاء

وأنا لسه بتدارى من الأشياء  
وبخاف بحكم التجربة  
وببص ل بكره على استحياء  
وأفرح فيغلبني البكا  
وأبكي فأضحك كبرياء  
ضعيف ضعف المشاعر  
قوى بقوة ضعفها في البكاء  
ميهمنيش كل الكلام  
كل الكلام كان منشأة من حاء وباء  
من بعدها كان اللقى ثم الفراق  
بسهر كثير لجل إني أنام  
بيقولوا عن النوم موة صغرى  
جايز علشان كده برتاح  
ولا عشان بقابل بكره في الأحلام  
فكرة تخطفني لحلم وحلم يخطفني لصباح  
يفاجئني بامبارح اللي عدى وراح  
نفس المشاهد والوشوش والحرام والمباح  
وأنا لسه بتعلم في خلق ربنا في الكون  
وأكتب قصايد وصف مش أكثر  
« و الشعراء يتبعهم الغاوون »

وأنا اللي جوه النص متبعتر  
أنا اللي تايه ويقيني زادني رجاء !

## سيمفونية التأبين

هات كل واحد جه ووقف جنبك  
شوف اللي قال بحبك اتغير  
شوف البعيد عنك لما بيحبك  
صنف الأشكال  
الاكتئاب مش حل  
اوعى تلعب الشايب مع نفسك  
اعلن اللي اتقال كله كلام فاضي  
وعشقهم كلام فاضي  
جه وقتهم يبقوا خلاص ماضي  
لون المرديات بلون الروج  
على قمصانك المركونة  
وولع كام عود بخور  
يدخل الشقة مع هوا البلكونة  
في سيمفونية التأبين  
الصالحين الطالحين

العاشقين الكارهين  
المشتاقين الزهقانيين  
كلهم جم في وقتهم سابوا  
خيبيوا أملك ودافعت عنهم بوصفهم خابوا  
وفضلت وحدك آخر المشوار  
قلبك في حضنك بس بيسبك !

## النداهة

ترميلى الشوك جوه في حضني  
تسقيه من قلبك حنية  
وبقسوة جرحك أتألم  
ترجعي وتقولي على عنيا  
وأتعلق بالخيط الفاضل  
وأجيب أملي يصبر فيا  
وبقى فاضل حبه وهوصلك  
وبقطع الخيط توصلني ليا؟!  
تنادينني تاني وبسمعلك  
وأجيلك مهو مش بإيديا  
ما انت النداهة وأنا المندوه

ومش شايف غيرك بعنيا  
ترجعي وتقولي القرب حلال  
وحرام لو قربك كان ليا  
في القسوة وفي الحزن حبيبك  
ده أنا عمري ما بسقيكي قسية  
بس في الفرحة بتنسيني  
وبتقولي استنى شوية  
ومفاتيح الفرحة اللي معايا  
مش لاقية لحبك تسمية!

## كلمة

كلمة تتشال من قصيدة  
تقلب المعنى في ثواني  
ومرة تتشال من قصيدة  
ما تلاقيش فيه شعر تاني!  
طاب ده تيجي؟  
لما كل شعري ينطق  
من غير ما تيجي!  
آه بحبك..

أقصد الكلمة ده يعني  
ارفضيها واشطبيها  
وهاتي كلمة مكانها تاني  
ولو لقيتي  
إدني في الناس ناديهم  
قولي ليهم  
المحبة كانت الضلال  
بس رب الكون هدايني!  
ولا أقولك  
امشي يلا  
خلي كل قسايدي تنزف جرح منك  
خلي شعري يستهجي  
طعم موتي في بعدي عنك  
دوقيني الشهد تاني  
مش كفاية أموت بسمك  
وقفني نبضة وجودي  
اللي دقت ياما باسمك  
واعلني يلا انتصارك  
وكملي وحدك ديواني  
وعنونه بأي اسم

يبقى لونه بلون هواني  
واكتبي الشاعر ده  
كان الشهيد اللي هواني!

## ضميني بفراقك

ضميني بفراقك  
زي ما ضميتي  
لقايا من غشك  
خليني أتهجى  
القبح لما اتخلق  
وبان على وشك  
خليني أضحية  
مدبوحة يوم عيدك  
وبدم كف فراق  
زوقي عشك  
بعد الفراق ندمان  
طبيعي إني غلط  
أنا اللي شوفتك غلط  
مع ذلك اتمسكت !

وإن كان على قلبي  
عادي ولا يهملك  
ما بقاش يعيشني  
لما ارتوى بسمك  
وإن كان على حلمي  
الكفر بيه واجب  
لما نطق باسمك  
وإن كان على رجوعك  
غرقت كل شطوطي  
فبعدت عن يمك!

## أَسْمَا

لما تبقى ألوان كثيرة  
وسط لوحة بتيجي أسما  
بنت بتفك الضفيرة  
وترسمك وياها رسمة  
تيجي من بعد اللي فاتك  
تطمنك بوجودها جنبك  
تحكي ليها في ذكرياتك

تحكي ليك ده مكنش ذنبك  
لما تبقى ألوان وأسما  
كان لابد تيجي دنيا  
حاجة يعني تفوق خيالك  
حاجة يعني حاجة تانية  
لما تبقى ألوان واسما ودنيا  
تبقى قصة جايه  
والخيانة في كل قصة  
حيه لازم تبقى حيه  
فمهما سُفت ألوان كثيرة  
من المحبة فضلت أعمى  
في دنيا ترتيبها الطبيعي  
تيجي حيه فتبقى أسما!

## واد كوتشينة

أنا واد كوتشينة  
برسمة قلب  
وبقش لآخر الحدوته  
من طعم القرب

وبفرق ورقي على غيرك  
من كثر الغلب  
وبدمع زي دموعك في وداعك  
م أنا كنت مقرر هتفاجئ  
لما هترميني في آخر اللعب!

فشار

بس عمیق جوه الباکیت !

## أقربهم إليك

بما إن الأرض دايرة وبتدور  
وإنك في الموقع ده ثابت  
أقربهم إليك  
أبعدهم من الناحية الثانية  
بمعدل متناسب ثابت  
مع نسبة قربك أو بعدك  
في حقيقة الكون ده بيثبتها  
إنها مهما بتبعد عنك  
بتقرب جدا لو سابت!

## فاضي

نص الكوباية ده مليون  
بأمل وحاجات راح تتحقق  
وهتملا في النص الفاضي  
والنص الثاني بخذلان وهو  
وحاجات بتروح منك ع الفاضي

مين فيهم بقى يعني المليون؟  
علمياً الاتنين.. ونظرياً  
بتصدق وهمك لو فاضي!

## زي الأراجوز

بستغرب مني كثير يعني  
وقت البدايات مبقيتش افرح  
مبقيتش أشوف غير نهاياتها  
وكأني حته في مزيكا  
مكتوب تتقفل بناياتها  
وأستغرب أكثر  
لما الفرحة يطول حبة  
مش حابه أتعلق بمحبة  
مش حابب قلبي يكون يعني  
زي الأراجوز  
كان دائماً يحلم بسعادة  
واقتمادى في فرحته بزيادة  
كان عاوز كل الناس تفرح  
قاموا ضحكوا عليه

فنسي من الأول كان عاوز إيه  
طبطبت عليه  
فضحكني ودارى اللي مخبيه  
قولتله احكي وعيظت عليه  
قام رد وقال مش عاوز أعوز!

## ضل

من كام خيط نور  
قادر يهرب من بين الشيش  
الضلمة تدوب  
وتبدأ ملامحنا تبان بشو يش  
في البعد الأول كان الفرخ  
وكنا بخيوط النور دراو يش  
والبعد الثاني كان الضل  
بيقول للضي أنا بيك راح أعيش  
والبعد إيه بقى هيحييه  
وضلي بيحضن ضلك ع الحيط  
لو كان للبعد مكان بينا  
ماهو كان الضل رفض التسليم

كان مثلاً بدل أما يرسمنا  
يخاصمنا ويرسم شخايط  
كان خلى النور يحضن في الحيط  
لكنه حويط لكنه لئيم  
والظل يرسم  
صورتى وصورتك ع الحيط  
قام قال للحيط  
إزاي الحضن ده ذنب عظيم  
و كان ناسي  
إنه بيحضن في حيطان البيت  
وبنفس الذنب ومع أول ضي  
صابه التحريم!

## الحقيقة

كل اللي سألناهم عن حقايق ضللونا  
ودليلهم كان من مرجعية الباليين  
والحقيقة إن مفيش حقيقة مطلقة  
الحقيقة بتقولك امشي في سكة العارفين  
والعارفين نفسهم معندهمش حقيقة

لو عندهم مكانوش مشيوا ليها سنين  
الحقيقة بتتلون بلون ما يستجد  
ولون كل لحظة عشتها من جزر كان أو مد  
وبتولد في عقل طفل بيعترض فامد  
وقتها الحقيقة بتصالحه وتقوله راح أبوح لك  
بس إوعى تحكي لحد !  
الحقايق بتختلف مع التوقيت  
واللي سبقوك ليها هما من ضلوا  
وقت اختلافها هما آخر ناس  
عن الحقيقة اللي وصلولها اتخلوا  
وانت مش عارف حقيقتك فين  
لحظة ميلادك لقنوك اسمك  
لحظة ميلادك اختاروك دين  
لحظة ميلادك في الحقيقة بيتولد جاهلين  
والحقيقة تزيدك جهل لجل تعرفها  
الحقيقة بتتسلى بالبني آدمين !

## خارج عن النص

خارج من الجنة

ونازل أرض والتوبة امتحان  
خارج عن النص  
وعارف إن رجوعي فيه الأمان  
مطمئن بخوفي من رجعتي ليا  
آدم سمع حوا وساب النص  
شيطان؟.. ملاك؟..  
آدم فضل في النص  
وأنا اللي حلمت تكوني يوم ليا  
آدم نزل للأرض عشان إنسان!

## دوشة

الضد بيكمل آيات الضد  
الكلمة منشأها السكوت  
الكون بيعلن إكتماله فيك  
لما الحياة تزرع ما فيك الموت  
جربت كام مرة تفرح فقومت بكيت  
عملت كام ذنب عشان صليت  
ما كرهتتش غير اللي يوم حببت  
الضد بيعلنك للسكون دوشة

فتعيشه دوشة بس من غير صوت!

## الحنن جميل

الحنن جميل  
بيقل الدوشة من حواليك  
وبينهي الفرحة المتعلق  
مبقاش فيه حاجة بتفرح  
فتبطل تحلم وتقلق  
الحنن فراغ  
تملاه من تاني بناس رايعين  
فرصة من تاني علشان تبدأ  
حكايات لو فرحك كان طول  
مكانتش بكذبها هتصدق!

## الشوارع

الشوارع هتفكر أوقات  
بالذكريات القديمة  
الشوارع فينا سيما

بتعرض أفلام الذكريات  
لكنها بتيجي يوم وتتغير  
وانت بتفضل تحن للي فات!

## فبتدوش

بالرغم إن الحاجات كتير  
بتشوفها لسه بتندهش  
وإنك عشان تلاقى الضايح  
فكل المرتب يتنكش  
بالرغم إنك كنت بتحب  
المحبة كرهتك  
خلصت فيها كرهك  
بس باقي محبتك  
لكل حاجة بتقابلها  
وتفارقها  
فصمتك بيعلا بالفرح  
أو بالعياط فبتدوش!

## فرح

حزنك أوقات بيغير م الفرح  
فيزود طعم الجرح بملح  
فالفرح بيزعل من حزنك  
فيطيب جرح الحزن بفرح!

## كمالك فيك

كمالك فيك  
فمن غيرك بيغي النقص  
كأنك طقس  
كان دافي بقى بارد  
كأنك رقص  
من عاهرة لطوف عابد  
بتتمرجح  
مابين النعمة والحرمان  
فبالنعمة بقيت حامد  
وم الحرمان بقيت زاهد  
وم الزحمة بقيت واحد  
في قلبه كل شئ والعكس  
كمالك فيك

كان مستني بس النقص !

## القرب والبعد

البعد أرحم ولا القرب أرحم  
سألت قلبي السؤال ده فضل حاير  
قالي اللي أرحم وربنا يعلم  
إن المحبة حق وكعبها داير  
على القلوب  
بتوزع الفرحة على العاشقين  
والعاشقين  
ما بيرحموش أنفسهم م العشق  
الرحمة في قربهم قلبين  
وفي البعد تبقى حنين  
والفرحة والحزن  
زي النبات في قلب الشق  
القرب والبعد فين ومين وإزاي  
كل اللي بعدوا قريبين  
والي فضلوا مصدقين  
شوفنا فيهم اللي بعدوا

في القرب والبعد اللي متفقين!

## جربت تموت؟

جربت تموت؟!  
م الحزن؟ م الفرح؟  
م الخوف..  
م الوجع المتداري في المألوف؟  
كنت التجربة لكثير بعدوا؟  
جربت تكون أعمى وبيشوف؟  
بلالين الحضانات منفوخة  
بهوا الأحلام الممسوخة  
تاخذك وتطير فتموت م الخوف  
على حلمك ليفرقع فتقع وتموت  
جربت تموت فتبطل خوف؟!

سلام

الدنيا والناس والغرام  
وما بين مباح أو حرام

العمر خدني معاه ف رحى  
بكيت كدير بعدين فرحت  
وأتاريها حرب لجل السلام!

## فبتغمض

مرايتك الكاينة  
على جدار حمامك تبرق ليك  
وتضرب نور كده في عينك  
فبتغمض  
تفتح تاني وتحاول  
تشوف وشك فتضحك ليك  
فتضحك ليها تسايها  
فترجع هي وتكشر  
تكشر ليها من تاني  
تقولك شوف ضحكت عليك!

## دبوس الشك

الثقة بتزيد

فتقلل فيك أسباب الشك  
وبدل ما تموت م الحزن ساعات  
بتموت م الضحك  
وبتفرح كده بالبالونة  
الفرح جميل مش بيدمع  
وبتفضل ليه تدافع عنها  
مع إنك عارف هتفرقع  
لما هيلمسها دبوس الشك !

## شباك التذاكر

زي شباك التذاكر  
وهما سافروا  
مش هتفرق للفراق  
أو حتى موت  
غير في شوق  
كلهم نزلوا حقيقي  
بس فيهم ناس لتحت  
وناس لفوق!

## بليد

على مذهب أنا برجع  
على ما فرح أنا بدمع  
أنا أبلد بليد سمع  
فساب الدرّس والتسميع  
وساب تكديره والتشجيع  
وراح حالف ما يوم يرجع!

## كان لازم

كان لازم تفهم  
من لقا أول سكينه مع الجرح  
فيه لقا أوقات بيسيب موجوع  
والوجع المبهم  
بيكون منك ومن طعم الملح  
كان لازم تفهم  
إنك في لقاك كنت مفارق  
حد بيحلم

لحد ممكن متكونش معاه فارق  
وإنك بلباقك وحدك موجوع!

## أكورديون

أكورديون فجأة بلحن انطلق  
نغماته هدتني وخذت معاها القلق  
ماله في إيدك بقى رايح يمين وشمال  
يكونش ده قلبي وم المحبة اتخلق!

## ونس

لولا إني وحيد  
مكنتش لقيت الونس  
ولا كنت شوفت  
في كل حاجة العكس  
المجد للوحدة  
اللي بتعرفك نفسك  
وبتخلقك حياة  
من قلب موت يأسك

وبتَزَهْدِكَ كَدْبِهِمْ  
فَأَصْدُقْ مَا فِيكَ يَتَحَسُّ!

## سيزيف

بتعيد في القصة زي سيزيف  
وبنفس الدهشة كام مرة  
مستغرب ليه من نهاياتك  
كان ممكن هتحن الصخرة!؟

## معلش

كعيل بل مريسته  
كنبي ياس من رسالته  
ككل الواقعين  
على طاولة معلش  
كشكل الصدق  
لما بيُغْتَصَبُ م الغش  
كحد حزين على الفيس  
قام كتب حالته

ودارى الدمعه بالتهريج  
كبحر يهيج  
وبعدين يصفى بالتدرج  
فيرسم زاوية  
منفرجة بمنقلته!

## زي كتاب

أنا زي كتاب مليون حوادث  
ومع ذلك حوادثي قديمة  
أنا آخر سطر ومن يوم ما وعيت  
متبهدل والجلدة سليمة  
فعاشوني كل من قرأوا  
وبعدين فارقوا  
فيه عيون بصتلي في يوم فرقوا  
وعيون ملهاش عندي أنا قيمة!

## ذكرى

في معادلة بسيطة ومتعادلة

هات كل حياتك فضيها من كل مفيش  
هات معطى فضل لبرهانه يعيش  
سيب المطلوب قسمة ومكتوب  
كرر كل طرق حلك كده بالمقلوب  
هتلاقي نتيجة كانت سهلة  
يا تعيش فتموت يا تموت فتعيش!

## غاز حامل

الفرق بين المركب والمخلوط  
كواحد اتولد أراجوز  
وواحد قام لبس زعبوط  
كخلط الحزن في دماغي  
بسخرية وأنا مبسوط  
وتحت تأثير كام عامل  
من فراق ومن اتفاق  
بقيت يعني كغاز حامل  
بحب الدنيا زي الكورة  
بنطقها على دماغي  
عشان أديها بالشلوط!

## تبقى هانت

تبقى هانت  
لما هانت  
كل حاجة بتغلا تملك  
فجأة ترخص تبقى كانت  
ولو معشناش الحكاية  
للبداية و للنهاية  
كان لابد يبقى تالت!

## لو كنا نشوف

لو كنا نشوف الناس في البعد  
ونعيش فرحتهم بعد ما بعدوا  
كنا هنبطل وقت العند  
نعند في قلوبنا الي اتوعدوا  
والي اتخانوا  
لو كنا نشوف كانم بانوا  
العمأ أوقات

بيخبي عيونا بألوانه  
من شوق مرة  
على ذكرى جميلة لكن مرة  
بيخاف ليشوه في قلوبنا  
فيقولنا وعد  
ومين اللي بيهرب من وعده!

## مع كل نهار

الليل مسافات  
وأحلام بتسابق بيها النوم  
وأهات من ذكرى في حلم ومات  
أعلاها بيبقى بصوت مكتوم  
الليل لوفات  
مع كل نهار بينقص يوم!

## آخر شفطة

الوجع إن خدت عليه بيخف  
ودموعك ترسم ألوان الطيف

والفرح بيسكن جوا الحزن  
يا تسكن وياه  
يا تزور الفرحة مجرد ضيف  
الذهب الدايب جوا الصخر  
العمر المستنيك في العمر  
في آخر شفقة في كوباية الشاي  
لو سيبتها من غير ما تقلب  
السكر زاد من بعد المر  
ليه كنت حزين  
طاب يوم ما فرحت  
كنت متأكد رايح فين  
أو جاي منين  
كلنا والنبي مساجين في الحزن  
بنتمنى الفرحة اللي في إيدنا  
يا تشوفها قلوبنا بألوانها  
يا نغمض عيننا بحزن كيف!

شئ مش موجود

شبه الألوان لما بتزهده

للمشهد فتدارى بالظل  
الصورة بقت أبيض وأسود  
ملاحها بتدارى من الكل  
فتزيدها غموض  
وتزيد الرهبة من الألوان  
شئ مش موجود  
إزاي غشك بألوانه زمان  
فسرق من عينك طعم اللون  
بفلاش يبرق والعدسة تزوم  
الصورة بقت يا أبيض يا أسود!

## المسألة

صعبت حل المسألة  
الكون ده أصله سنبله  
وراعي غنم  
وحاكم في هيئة كام صنم  
ودراويش بترقص في الخلا!

## عكست اللون

كأي جديد  
كتوب العيد  
بتبقى الناس في بدايتها  
وألوان السما السبعة  
تسبح بيك في سبحتها  
وتلقى الحلو بيمرر  
فتاكل مر تفاحة بحلاوتها  
يا مر الفاكهة ده احلوت  
فنزلت ناس بجنتها  
وألوان السما السبعة  
بتصبغ فيك بصبغتها  
فتتلون ككل الناس  
ولبس العيد  
وتبقى قديم لو اتلونت  
بدون اللون  
عكست اللون  
فشوفت الناس بغباوتها!

## الطرق الثانية

مش كان يمكن ..  
دي الطرق الثانية ..  
اللي بنهرب فيها من العلم ..  
م أنا لو غمضت ..  
وقت ما فتحت ..  
مش كنت فرحت في قلب الحلم ..  
في الناحية الثانية  
دايما فيه حاجات  
بتنادي قلوبنا فتمنى  
آدم وقت ما اختار الأرض  
كان عاوز يسكن في الجنة!

## معامل صد

بقيت والحيطة نشبه بعض  
وبنكون معامل صد  
وتتكسر مننا حته

بحنية لخاين وعد!

## نيكوتين

قلبي بيسود من النيكوتين  
ومن ناس بيمثلوا بني آدمين  
فبخاف م الناس و من التدخين  
وبخاف م الموت  
الموت يضحك  
بعلو الصوت  
خايف على إيه والنبي مسكين!

## كلام ملوش معنى

الباقي من صمتي  
كلام ملوش معنى  
حبة كلام عن فراق  
وحبة كلام عن عشق  
ولو سكتنا وقت المحبة  
مكانش جانا من المحبة فراق

ولو سكتنا وقت الفراق  
ممکن سكاتنا كان من العند جمعنا!

## حياة أو موت

كأي دليل على الأحزان  
جه دمعي  
بضعف يزلل الجبروت  
أنا تعبان  
ومرتاح جدا  
لفكرة الحياة والموت  
حياة تانية ؟  
طاب الأولى فادتني في إيه  
ما سبتش شئ ما موتش بيه  
لكني حييت  
أحزاني وأشجاني  
كأني كنت من أسباب  
حاجات تحيا في حاجات بتموت !

## كل شئ

كل شئ من بدايته جت نهايته  
الكلمة بفرط جمعها نطقت سكوت  
من غير حياة مكنش ممكن يجي موت  
كل شئ في البداية كان لك ميلاد  
كل شئ في النهاية كان لك تابوت !

## فلسفة

كل اللي وعدك خان  
واللي ما معرفتوش وفا  
قرب البعيد  
على طول دفا  
خليك بعيد  
البعء قرب  
والكون تضاد  
ياللي عشقت الفلسفة!

## الجهل جميل

مبقيتش بشوف غير كل جميل  
فبسيب الحزن مع التفاصيل  
وببص على المشهد كامل  
النقص يكمل نقص قديم  
شكل المكسور ملزوق وسليم  
فبقيت غبي جداً متفائل  
والرؤيا إن غابت ع التأويل  
هتغني معايا الجهل جميل !

## ترس

دايرة وبتدور  
والترس يعجز فيعكز  
على ماضي بسنونه الناقصة  
الترس يدور  
تتعاد الأحداث ١٠٠ مرة  
وفي كل إعادة ١٠٠ قصة  
فتعيش بتكسر في سنونك

ويجي موتك ينتهز الفرصة !

## اتجاهات

نهايات دايمًا ملهاش نهايات  
والحلم بقى بيفارق العلم  
هتنام تحلم وتصحى في حكايات  
أراجوز بيمثل نفس الفيلم  
في سهوم تانية هتمشي عليها  
لو راح تمشي يوم عكس السهم  
وسهوم بتشاور في اتجاهات  
وفي كل طريق بتقابل وهم  
لحد ما بتفوق  
فتلاقي بس في اتجاهين  
يا بتنزل تحت يا بتطلع فوق  
فتهرب من تاني لعدم الفهم!

فيما حكت دنيا  
( يا سادة يا كرام )

## فيما حكت

فيما حكت جدتي  
إن الأميرة في يوم  
راح تلتقي بأمير  
لكنه كان مسحور  
فتفك سحره وتقبّله  
فيصبح بحبه أسير  
فيما حكت دنيا  
إن الأمير قابل  
أميرة مسحورة  
في هيئة مسخ  
وجه يقبّلها  
لجل تعود له أميرة  
سمها فيه بخ !

## أنا الحكايات

مودعتش

وفي كل وداع  
بيفضل كل من ودع  
ويلقى مكانه في الذكرى  
كأن بعده زاد قربه  
ومن ماضي بقى بكره  
ومنسيتش  
كأني كتاب لحواديتكم  
بتحكيها السنين فيا  
تقول غاوي محبتكم  
وحابب وجعه من ديه  
ومن ديه  
جريح كان وجعه ليه ديه  
وكان بيحن للي فيه توجع  
حفظ كل آيات العشق  
عند في الحصة ما سمع  
ركع كل اللي شافوا العشق  
لكنه حلفلي ما يركع  
أنا الحكايات  
وهو من ملا كتبي  
فعاش بيا وعشت أنا فيه

ووقت البعد قربلي  
وحلفلي إنه ما يرجع !

## نهاية الحواديت

في نهاية الحواديت  
بناكل دائماً التوتة  
وتعلا منا تنهيدة تقول يا سلام  
في نهاية الحواديت  
بنلقى الحلم بيقرب  
وبنجرب نقابله ننام  
ونصحى منه بالعافية  
كانت واقفة هناك حافية  
وبتنادي تعالى قوام  
وكانت عينها  
بترسم وشي من تاني  
وبلقاني كده متلخبط  
وبعبط بأي كلام  
وبخرج مني اكمني  
بخاف تيجي وتحضني

تحس بخوف أو استسلام  
وبلضم حلم في الثاني  
تجيني كمان أقول تاني  
يابخت اللي يجيله حبيبه  
ف قلب منام  
وأهو صوت المنبه دق  
صحيت وقابلتها ناسية  
وفايته حلمي ع الناصية  
ولا قالتلي حتى سلام!

## شجرة إبليس

فهيجي اليوم وتقولي عشقت  
وهقول أنا تب  
وهيتكلموا ع البعد ما بينا  
تلاقيني سكت  
هاكل من شجرة جنة قلبك  
م الطرد عقاب لأنني حلمت  
وهستكبر أركع ليكي برفض  
سميني إبليس سميني فهمت

من دقة قلبك اللي خدت ع الرقص  
كانت ديانات أنا بيها كفرت  
ومن رف العرض  
لكام سلعة محتاجة الرص  
أنا مش محتاج إكمني نزلت  
أنا أصلا جيتلك لجل ما ألقى التوهة  
وأما لقيتها عاشتني فضعت  
م الأول قررت إني أبعد  
بس كسوفي خلاني فضلت  
وفضلت أتفرج وأمثل دور لما الواد  
بيضيع م البنت  
وهيجي اليوم والبعد مكان  
وهكون غلطان إني اترددت!

## مش ليلي

فلا انت ليلي  
ولا قلبي  
هيفضل بيكي متجنن  
يادوب ذكرى

بلون الحزن  
في قسايدي هتتلون  
فيوم ما تعودي  
راح تقري على قلبي  
يسهلك بقى يحنن  
فروحي يا شاطرة  
شوفي حكاية على أدك  
كثير قلبك  
يخون الوعد لو واعدك  
كثير حزنك  
يضم السكرانين زيك  
فملكيش شاعر  
لانك باختصار توهة  
بدون قلب ولا مشاعر  
فشوفي قصة غير ليلي  
لأن اللي في قلبه جنون  
مهوش ناقصك من الآخر!

هحي عنك

لما تيجي الذكرى ليكي  
في القصيد هحكي عنك  
فحاولي كل ذكرى ليكي  
تكون سعيدة  
هاتي من قلبك حكاية  
تكون جديدة  
سمي كل ديواني باسمك  
لما تبقي أجمل قصيدة  
وغمي عيني  
في وقت ما تخميني عنك  
والحقيني لو هفتح بحضن منك  
واعملي إنك حابه شعري  
قولي قلبه من الدنيا ده مهري  
كوني غير كل القصيد  
لما كان عشمي وهم  
كوني جوا قلبي حلم  
حتى لو بعد القصيدة  
كنتي جوا منه سهم!

## سيدنا الفراق

سيدنا الفراق  
ركب البراق جانا  
وبتقش دم  
علم على هوانا  
سيدنا الفراق  
ولي وله كرامات  
وكرامته من ذلنا  
وم الجرح اه يانا  
وصلاته كانت غير  
صلاته من حيرة  
كلماتها مجدولة  
في فيونكة بصفيرة  
صعب في يوم تتحل  
متحصنة بطلسم  
وبالخوف بقى اسيرة  
سيدنا الفراق كاتب  
للبعد ألفين سبب

سيدنا الفراق يقول  
إن إحنا كنا السبب  
لسيدنا الفراق علامات  
في وقتها بينكتب  
وأنا لمحت العلامة  
حيرة بتسرق هوانا  
وتجدله ضفيرة  
وتعلن إن اللي بينا  
من المحبة مات!

## سيرة اللي جاي

الوعد والموعد  
والقصة حدوتة  
تحكيها بنتي كجدة  
لنسلي الجاي  
وتزيد عليها الدراما  
في سيرة أب  
تجري بسرعة  
على لسان عيال الحي

ويكبروا ويحكوها لعيالهم  
فتضم حكاياتي الضلام والضي  
وتضم حكاياتهم اللي متعرفتش  
وخبوها فيا  
وفي حكايتي بفعل الخوف  
أنا الشجاع المحكي في أي ظروف  
أنا المثل لما انضرب بيا  
وأنا الفلاقي لما اتحكي عليا  
وأنا الإمام وقت ما قالوا حي  
أنا سيرة اللي حصل  
وقت التاريخ ما اتحكي  
فحكي حكاية عني محصلتش!

## دروس

كل الدروس مستفادة  
مكنتش يعني للمذاكرة  
أو حتى نفعت للإعادة  
ومع إني يعني تعبت فيها  
عايش نهاياتي بسعادة

كل القصص وقت أما تكمل  
بتطفي حيرة الفضول  
ويروح معاها الحلم والمجهول  
آخر طريقك في النفق  
مكانش فيه طريق يطول  
ولجل أما تصبر  
عشمت فيك إنك تنول  
فقدمت نفسك لكام خذلان  
وصلت لإن السعادة  
أما بتتعود على الأحزان  
حرقت في سجايرك  
قبل ما تتحرق قبلها  
رسمت بدخانها  
حاجات كثير عشتها  
وظفيتها في الآخر  
وقت محلمتش  
ببنت زي القمر  
بتقولك اتاخر!

## منبه

بقى يعني منبه مش مضبوط  
مش مستنى أوقات للرن  
ببزاخم فوق الكومودينو  
لجل ما يحفظ لوجوده مكان  
وبيقرا في نوته كانت قربه  
كان ممكن ما بقاش في الإمكان  
يفتكر الوقت  
مع لدغ عقارب من قلبه  
ويسحب في سجاير  
من طفاية كانت جنبه  
ويسهر أوقات  
مع فنجان قهوة وشربه  
ويرجع وينام  
ويصحى في مواعيد  
مش واعدينه  
وبيستغرب  
من شكل موبايل كان بيحبه

## خليط الذكريات والأمكنة

خليط الذكريات والأمكنة  
يضميني من غير ما يلقي أسباب  
كل المستحيلات بقت ممكنة  
بنام وأصحى وأنا المتساب  
بقي عادي كأني زهدت في القصة  
فتساب وأقابل كل يوم أحباب  
يارب ياللي جعلت في اللقا فرحة  
يارب ياللي جعلت سبب لكل غياب  
أنا بحمد ومش عارف  
يجوز جدا يكون الأعمى مش شايف  
وأنا لسه بخبط نفسي في الضلمة  
ومطمن لبكرة  
عشان مفيش أكثر مما أنا خايف  
قالتلي وهي بتقرب في يوم مني  
بان ريحتي  
خليط عجيب من عبير هافف

ما تعرفش إنه  
خليط من كل شئ فاتني  
الذكريات والأمكنة  
وحضنها وحضن غيرها  
كف الصحاب والطببة  
وحضن أمي  
لما بتلف في عبيرها  
يارب ياللي خلقتها  
وخلقت كتير غيرها  
مشوفتهمش  
بما إن عمايا خلاني هنا أسيرها  
فخليهم يسكنوا كل الحكاوي الممكنة  
وما يبعدوش  
زي ما قربت مني  
في الذكريات والأمكنة!

## ضل العفاريت

كل الحواديت توأبيت  
وأنا لسه بحلم بسعادة

وبداري الماضي الي أنا عشته  
من تحت طرف السجادة  
أوقات بستغرب من معتاد  
إزاي قادر يكمل للوقت  
وأنا بتغير بمجرد جملة  
«أعلنت ساعات ضبط الوقت»  
فاتخض ازاي  
متغير عايش كالعادة  
وعمره بيحرق نفسه في شمعة  
بتبين ظل العفاريت!

## رنة

تليفوني يرن  
ولأول مرة أشوف النمرة  
من غير ما أحن  
وصوتك في النعمة مجرد زن  
ولأول مرة يبطل رن  
من غير ما أتجن  
تليفوني ده كان

عائش وانا القصة بحالها  
من أول ما أخذت النمرة  
علشان أطمئن على دور البرد  
ولحد ما بقيت أنا نمرة  
من كتر ما داقت مش قادرة ترد  
وما بين كده أو كده  
كنت أنا ماردا جوه المصباح  
بمجرد رنة بيهز الأرض  
كنت بصلي لقلبك كام فرض  
وبفرض مجاش منك رنة  
كنت بكلم نفسي  
وأقول بكره هيجيني الرد  
وفي البعد لقيت الرد بصد  
ومن ألف سؤال محتاج للرد  
ملقيتش إلا إجابة بتقول إن  
تليفوني عمره ما هيرن  
إلا علشان تهربي حبه  
من دنيا انت اخترتها فقلبك بيئن!

## قَصَادُ الْفَجْرِ

قُصَادُ شِبَاكِي كَانَ قَصَادُ  
يَعْدِي الْفَجْرَ  
يَقُولُ الْغَنُوةَ يَنُورُ بِيهَا شِبَاكَكَ  
تَغْنَى فَنَاجِينَ قَهْوَتِي  
مَعَاهُ غَنَاوِي الْهَجْرَ  
وَتَرْقِصُ نَشْوَتِي بَضِي عَيْنِ شَافِكَ  
مَنْ ظَلَّكَ وَرَا الشِّبَاكَ  
تَعْشَمْنِي غَنَاوِي فِرَاقَهُ بَلْقَاكِي  
وَتَقُولِي يَجُوزُ مِنْ حَزْنِهَا زَهَقْتُ  
وَأَكِيدُ قَاعِدَةَ بَتَسْتِنَاكَ  
يَا دَوَاقِينَ اللَّحْنَ لِمَا بَكَ  
يَا مَزُوقِينَ الصَّمْتَ بِالْكَلِمَاتِ  
يَا مَرَجِعِينَ النُّبْضَ مِنْ تَانِي  
لِقُلُوبِ حَيَاتِهَا بَتَتَقَلَّبُ لِمَمَاتِ  
يَا رِقْوَةَ مِنْ جَدَّتِي عَلَى عَرُوسَةٍ  
يَا حِكَايَةَ مِنْ جَدَّتِي

قبل ما أنام أوقات  
يا صبح راسم ملامحها ويا الفجر  
ولعنين بتنعس بشاور  
تشاور قلبها بدقات  
قصادنا يلمحنا فيتدارى ويغني :  
بعييييييبييد يا حزن  
ننزل نسلم  
ولأمر هوانا بنسلم  
وجرايد الجمعة على السلم  
حضاننا فوق الحضن!

## كان ياما كان

عينيكي الهربانين مني  
في كل مكان  
تشوف الورد بيفتح  
تشوف العاصي فيسبح  
تشوف الدمعة فبتفرح  
كأنك أميرة في الحدوته  
ومن نظرة

هتحيي أميرها فيفتح  
ويحكونا في كان يا ما كان!

## قليل الحيلة

قليل الحيلة أو خايف  
وأعمى لكن بقول شايف  
وعارف مهما قربتي  
بإني لسه مش عارف  
وبطمن لخيط شكي  
وأخاف في يقيني أكون خايف  
لكني بنور عنيكي ضويت  
عشقتك زي بكره مجاش  
فرحت بحبي واتوضيت  
وميت فيا حلمك عاش  
أنا مطمئن فلا بقرب  
لشيء مخلوق بعيد عني  
ولا بخمن ولا بجرب  
ما كل مرة بظلمني  
آمنت بحبي من كفري

وخوفت أطمع في جنة  
فأعيشك نار

يجوز يعني يكون قدري  
في جاي وقت ما هيجي  
هكون مختار

ويجوز بردو  
أفضل الشتا وبردو

على إني أعيش مختار  
فضميني

كرؤيا في نومي تتصدق  
كارابيسك ومتعشق

فراق معرفش يتفرق  
فزاد قربو من بعدو

كأي حقيقة تتحقق

بتمحي كل شئ زايف

فأخافك لو يكون خوفي

وأجري ليكي لو خايف!

## معاهدة صلح

في معاهدة صلح مع الدنيا  
هتنازل عن ماضي وعشته  
وأتنازل عن حاضر جالي  
مش زي ما يوم مره حلمته  
وأتنازل عن قلبي ووجه  
منا قبل الدنيا في يوم دوسته  
وأتنازل عن عقلي إن فكر  
ما هو نابه من التفكير حيرته  
وعن واحد بقى كاره سيرته  
وعن أي كلام لحظة كتبتة  
وعن أي كلام..  
وأضحك على نفسي بمسمى  
فأقول والله معاهدة صلح  
فترد تقول لأ ده استسلام!

## رؤية أو رؤيا

الرؤيا جتلي فعنيكي ندهنتي  
والقلب وعدك ما انت موعودة  
نظرة وبسمة ومني خطفتني  
يادي العيون لما تكون سوده  
وحكتني عينك ألف حدوته  
كت تستهجي النظرة وتداري  
وتشوف عينيا تقولي طاب مالك  
عمال تداري وقلبي أنا داري  
والحلم زارك رؤية أو رؤيا  
مجنون وجالك يرتجي رقيه  
يادي عنيكي بقت لقلبي مقام  
درويش وعنه ما تتحجب رؤية  
طوفت قلبي الطوفة جت سبعة  
تممت بالسر اللي ليه سامعة  
وحكت شفايفي ليكي أي كلام  
فبقى القسايد والبحور والشعر  
وحياني بيكي كفرح صاب دمعاه!

## تقسيم

فقد كان الكلام كاري  
وكاره كل من كر الخيوط مني وغزل توبها  
فبكي لو فضلت وحيد  
وأكرر ضحكة مع شيشتي على القسمة ومكتوبها  
وضحكي يمسي على خيبتني  
وفشلي في إني أسيب وردة على عودها  
وأقول للذكرى بقى اتلمي  
بلاش تتلمي عليا بذكريات أحزان الله لا يعودها  
ولو جيتي تجيبي الحلو متصفي  
فمثلا هاتي ذكرى لحسنها وبلاش تحكي لي في وعودها  
وخلي عودي لو دبلان يبات مليون  
بتقسيمي على عودي وتقسيمها على عودها  
ماقولتلكيش تجيبي الوهم  
بس يعني بلاش كل مجية بسهم في القلب الي حابها  
فبعدت آه هقول ماشي  
ده لولا البعد ماكان الشعر في قسايدي غزل توبها  
ده غزل البعد غلب القرب

ولو هرثي راح أرثي قلبي وهلومه إنه مكانش مكتوبها!

## زي فراشة

في خصامنا مكنتش بتحمل  
فيمر الوقت  
مُر ومتعشم بسعادة  
وكالعادة كانت تصالحني  
وتقول أنا بردو جيت الأول  
وأفرح بلقانا وما أبنش  
وأمسك في كرامتي وأتمادي  
فتقولي خلاص آخر مرة  
وحياتك مش قادرة أتحمل  
وتضحكني وهي بتشفط  
من فنجان القهوة السادة  
فأضحك وأقول آخر مرة  
وإن .. وقبل ما أكمل  
تحضني وقتها وتقولي  
أنا بعشق قلبك بزيادة  
زي فراشة قابلتني

فكانت ألوانها دائما أجمل  
بعدت ورجعت أعيش وحدي المشهد  
فكرهت حياتي المعتادة!

## مشورة

مع إني صليت جوا مني كثير  
لا طلعت شيخ ولا إمام للطريقة  
مع إني آخر حل للفوازير  
حليت ببوسة لبنت كانت مش بريئة  
مش يمكن معجزتي متأخرة  
أو إني نموذج المسخرة  
مش يمكن اللي فات  
كان من اللي جاي ليا  
وأنا اللي بديتها فجيت من ورا  
والضحكة مرسومة بسخرية  
مش ده اللي كان بيحب في الأوليا  
ما نابوش يا عيني غير مشورة  
بين حد كان هو كما صلى  
وحد عاش إرادته متسخرة!

## أنا مين؟

المحبة صندوق حكاوي  
رحنا ليه صغيرين  
شفنا دنيا جوا منه  
سقفت ليها الإيدين  
المحبة حبه حبه بتبقى دين  
أنبياءه كانوا أول كافرين  
وانت فين  
تجري مني وتستخبي  
وتغمي عيني وتقولي مين؟  
ضحكة مني غريبة حبه  
انت يعني هو انت  
بس يعني أنا مين؟  
تبصي مش فاهمة السؤال  
فأسرح واتبسم محبة  
والنهارده ..  
فيكي يعني سرحت حبه

وافتكرتك لما عشت البعد غربة  
وافتكرت الواد حبيبك  
لما كان بيدب دبة  
فتحضنيه زي ما حضنتي اللي بعده  
وكنتموا أول عاشقين!

## دراويش الساعة

وليلاتي بسهر للفجر  
فتعدي ساعات الليل بشويش  
وعقارب ساعتني الدراويش  
بتدور في مدار فضح الستر  
في مشيئة كائن بيحرب  
جنب القدر المسكون بالأمر  
بختار إني إختار أوقات  
وأرجع وأنا جيبني ملياتن كفر  
والليل يخاصمني فيه الشعر  
عدي عليا في صلاة الفجر  
صوتك في الذكرى العشرين  
صليت ودعيت ويا التايين

ودراويش الساعة عقارب غدر!

## تبات ونبات

تبات ونبات .. كل الحكايات  
كانت تنهيهها وكنت بنام  
اليوم يتعاد  
فتقولي الجده حكاوي جداد  
ترسمي في حلمي مع الأيام  
وأهرب ليكي في ميعاد النوم  
وفي النوم بتجيلي وأقول يا سلام  
النوم خطاف  
خطف اللي قلوبهم مليانة حنين  
النوم خواف  
بيخاف م الفرقة وم الصاحيين  
النوم مخاصمني  
وأنا لسه بقابلك في الأحلام!

## تالته ثانوي

شكل المريلة بيكي اتقسم  
كالبدر اتنور واتبسم  
حضنك للكتب أما خطفني  
أنا منك حبيت أتعلم  
احكي لي عني عامل إيه  
في خيالك لو مرة اتكلم  
وسألتي الواد ده عاوز إيه  
طاب ليه بيشفوني فيتبسم  
النظرة ده نظرة واد هيومان  
مجنون للعشق بيستسلم  
من عينه باين كان سهران  
وبالنوم وبقلبي بقى بيحلم  
احكي لي وهحكيلك عنك  
حكايات في العشق بتتكلم!

## الذكريات

الذكريات حواديت  
في دخان اللي فات  
من امتى وازاي بس فين  
الخيرانيين وقت اللقا  
الساكتين وقت السكات  
العشمانين يلا بقى  
طاب إيه بقى من أمنيات  
كل اللي راح شبه اللي جاي  
وكل جاي شبه اللي فات  
كل اللي كان في القلب حي  
بقى لسه حي في قلب مات!

## من سيرة اللي فات

شوية وحبه بالتدرج  
هتمشي جدتك فمفيش  
حواديت ليك تنادي النوم

شوية هتحاول تنام وحدك  
وليل الفكر ما يقضيش  
تنادي أمك ده أذن قوم  
يقل النوم وبالتدريج  
هتملا للسهر ليلك  
بقصة بنت بتودع  
وقصة بنت تناديلك  
وكام فنجان شربته  
عشان يشيلوا التهمة  
لما ترد مجانيش نوم  
فيما تيسر  
من سيرة اللي فات  
في الحلم نداهة في هيئة بنت  
بتخبي نومك تحت تأثيرها  
كأنها بقربها وبعدها بتعلنك  
حارس بتسهر لنومها في سريها  
النوم مجاش لما جدتي راحت  
ولما أمي ندهتني وقت الفجر  
ولما حبيبتني قررت تسهر  
تحكي لبيتها حكايات الهجر

في قصة فراق أميرة وأميرها!

## خلخالها

يا خطوة مايلة ورن خلخالها  
على كعبها اللي اتحنى واتنور  
على دقة منه قلبي غنالها  
وبدقة قالي سبحان ده من صور  
بصيت لعينها النظرة سحرتني  
الحسن صايب والحزن قتالها  
شافت كسوفي م النظرة ندهتلي  
قالتلي عينك جاوبت على سؤالها  
قولتلها عينك خطفاني ليه مني  
والفاكهة تنده في الطيب لأكالها  
والفرسة تأبي فارس ومتفرس  
وتحن للي من شوفته خيالها  
قالتلي اركب يا ولد عمي  
الشوق قتلني والجنة رايحالها  
دوقني سكر فرسة لو جمحت  
ما تدوقه غير م اللي شغل بالها!

# سِكت

السما أحيانا تندهلي  
زي أمي  
خلصت الواجب أقول لسه  
فتقول خلص  
عمرك بيزيد يعني بينقص  
حسن خطك  
واكتب كل المسكوت عنه  
وليه فجأة سكت  
آه يادي البت  
فيه حلوين في السما بيغنوا  
بس انت بليد  
بيها اتمسكت  
وانت مروح  
خد بالك منك وكويس  
بكره أجازة  
بكره جنازة!

## تأويل

يا تأويل الرؤيا والأحلام  
الواقع بقى محتاج تأويل  
الحلم يسيب  
الحزن يشيل  
القبح جميل  
الليل بقى للناس الصاحيين  
وقصص جدتي  
لما حكيتها  
ما كانتش بتوصف بني آدمين  
الفرح حزين  
وقت ما نفخ بالونته  
وقت الخذلان  
فرقع منه كل البلالين!

## ضي ملون

مزج التراكيب العجيبة

قابل لكسر وللون خفيف  
كإزاز لونه زوده بهجة  
أو زوده م البهجة زيف  
هتتلون ؟  
ولا راح تعكس في ألوان الطيف  
هتتكسر ؟  
كسرك لتشكيلك  
مش هتبقى ضعيف  
ماسك براءتي فيها تشكيلي  
تنطقني كلمة فيصح تشكيلي  
أشكيلها تنصفني  
وأنصفها تشكيلي  
الرسم بينور عيوني  
فبينعكس فيها  
المرايات شفت باللي تحتيها  
ملقيتش غير كلمة بحبك أغنيها  
فدموعي عكست فيكي لون عرقك  
والكسر فيا زادني نقش خفيف!

## اللقا

اللقا بيحيب حكايات تانية  
لفراق حكايات كنت عايشها  
وفراق خلاهم التقوا بيك  
وفراق من عاشوا معاك دنيا  
وفارقوك علشان لقا مستنيك  
وحكايتك تبقى لناس تانية  
بيفارقوا في ناس يوم ندهم ليك  
اللقا مليون بفراق الناس  
فبتفرح بيه وبيفرح فيك!

## من سيرة بكره

من سيرة بكره والجايز  
مليت ما بقيتش خلاص عايز  
وزهدت كل جاي ما جاش  
وأحلام ماتت قبل ما تتعاش  
وأيام فاتت

ما فاتتش عليا علشان أعيشها  
مليت الفرحة بمناقيشها  
وبطلت أوزع من قلبي  
على كل من قال أنا حابب  
والغايب دايمًا جوايا  
بقي زي غريب ملهوش نايب  
ما أنا سببت الصورة لتشويهكم  
وبقيت مش شبهي وبشبهكم  
أنا زي إزاز متخربش  
من ماضي ما بيعديش صورة  
وبطوبة كمان راح أتحول  
لألفين حته أكبرهم هتكون مكسورة!

## سيدتنا التجربة

فيما روت سيدتنا التجربة  
إن خطوتها هتكون  
على أطراف الصواب  
بعدين تقابلك  
فتبقى كطابع كان لزقه حتمى

علشان تحدد بيك انت قبلتها  
فتسفرك من الجنة لحضن الأرض  
علشان تضمن في النهاية جنتها  
فيما روت بعدها  
إن خطوتها بتبقى بدق الكعب  
من بعد ما اتملكت منك  
فتجعلك قوتها عليك في وقت الحرب!

## قميص الدم

فرقت قمصاني على ده الدم  
ورجعت وقالت الفراق الديب  
ورمتني في الجب من الغيرة  
وبكت وقالت كان لقلبي حبيب  
يبقى ليه كان وعد قلبك  
لما كنتيلي النصيب  
والنصيب أنا عشته وحدي  
في طبطة كف الغريب!

## صندوق الدنيا

صندوق الدنيا  
ما بقاش يبهرني زي زمان  
والواقع بقى أغرب منه  
وعمال يدهشني في كل مكان  
والدنيا صندوق متلون  
حبة ذكري وحبة بكره  
واللي ما اشترى وأخذ فكره  
واللي يحبك بعدين يكره  
صندوق الدنيا ده حدوتة  
واقع أغرب من أي خيال  
هتعيش دوشة  
فتبطل دهشة  
وتنام جواه علشان تتشال!

## كأنك حكاية

كأنك حكاية فبتعيشي فيا

كأني بشوفني جميل من عنيكي  
كأنك بخوفك وغيرتك عليا  
خلقتها دنيا وأنا تهت فيكي  
كعيل صغير في لحظة جنان  
بينقش باسمك جميع الحيطان  
ويغزل بغيرتك غزل الجيران  
ويشتاق لحضنك وشد الودان  
كأني دعيت في وقت الأدان  
فجت الاستجابة تقربني ليكي!

## عن الذكرى والحب

الذكرى هتلمنا زي الجدة  
وهتعيد حكاياتنا في قصص الحب  
وتفرحنا وتبكيينا فتسيب  
كام بسمة حزينة في حضن القلب  
والحب صلاة وحياة  
أو موت أو ذنب  
الحب ده أصدق مشاعرنا  
لكن في الذكرى اتحول كذب!

## مالهاش معنى

في التلت الأول كان الليل  
سهران ويانا بيسمعنا  
والقصة جديدة على قلوبنا  
والليل يقول مالهاش معنى  
في التلت الثاني  
كان فيه حبيب  
بيقول للتاني اقفل انت  
ويرد التاني بتنهيده  
نفسى أضمك بس ده امتى  
في التلت الثالث  
كانوا نايمين  
وواحد بيقول بقى وحشاني  
والليل محتار بين الاتنين  
مين اللي بيضحك ع التاني!

## حكايات تانية

كنا هنعيش حكايات تانية  
غير حكايات فيها بنتعاش  
بفرق المقدور عننا تانية  
وقت الخيرة مجاش ما اخترناش  
ولو كنا فهمنا إيه كان جاي  
كان موتنا فينا معشناش  
ما وقت اللعبة لما اتغمينا  
من فتح عينه صبح غشاش!

## طوبة نية

البداية في كل شئ  
١٠٠ طريق  
فيها كل طوبة نية  
تبنى منها ١٠٠٠ قصر  
يجمعك ويا البنية  
البدايات اللي خلت  
قلبي ليكي يسبق عينيا  
واللي خلتنى في سلامك  
يترعش قلبي وايديا

البدايات اللي فيها  
الوحي ينزل بالمحبة  
فكل شئ قبلك خطية  
وقلبي من بعدك أمير  
يا إما أقل من ضحية  
في البدايات كنت جنة  
كنت حنه  
قلبي قالي خدها بينا  
دي المحبة لو غناها  
مكانش وعدي  
مستحيل هرقص  
على نبضك لوحدي  
كان فاكرني  
ملكيت الاختيار  
وانت كل سكة عندي  
خدتني ليكي  
والبدايات اللي كانت  
طوبة نية  
ليه بنت في نهاية واحدة  
سجن للي عاش هواي

فمات في وحدة!

## الوردة

يا بياعين الورد ع الكورنيش  
أنا معيش  
حبيبة تليق لدي الوردة  
أنا وحدة  
ومع ذلك  
هاتولي الورد ده كله  
منا عايش معايا  
في الذكرى ١٠٠ واحدة!

## مالهاش معنى

في التلت الأول كان الليل  
سهران ويانا بيسمعنا  
والقصة جديدة على قلوبنا  
والليل يقول مالهاش معنى  
في التلت الثاني

كان فيه حبيب  
بيقول للتاني اقفل انت  
ويرد التاني بتنهيده  
نفسى أضمك بس ده امتى  
في التلت التالت  
كانوا نايمين  
وواحد بيقول بقى وحشاني  
والليل محتار بين الاتنين  
مين اللي بيضحك ع التاني !

أنا إنت وإنت أنا ..  
فمين بقى هيحضر حفلة ستة !؟

## ادعيلي

يا عم وانت بتصلي بقى ادعيلي  
وهاتلي من الحجاز سبحة  
وهاتلي من الفرحة فرحة  
وبنت جميلة في الطرحة تغنيلي  
بلاش من البكا دوه  
ده دوب قلبي من جوه  
وكفاية دموع على سهوة  
بتنزل لما تشكيلى  
وبقى احكيلى  
كتبت من المحبة ايه  
تعيد بيها تشكيلى فى تشكيلى  
بلاش من جرح خدت عليه  
يخليك كده فى ماضي  
ومستنيك لما تناديلي !  
م أنا وانت يا دوب واحد  
فيبقى ازاى هشوف بكره

وأعيش ذكري  
فيا عم وانت بتصلي  
أمانة عليك بقى ادعيلي !

## آخر حد

أنا آخر حد  
أنا دايما متلخبط في الرد  
وإكمني بحبك  
فأنا خايف فجأة تروحي لحد  
وخايف من قربك  
خايف لتموتي فيا بجد  
أنا أصلي خريف ياما جيت للورد  
فمات فيا فموتني بموته  
فبقيت أنا حد بيواسي في حد !

## لسه بكبر

أنا لسه بكبر  
وسايب معاكي قلبي الصغير

وضحي القديم مع الذكريات  
و بمسح بقلبي نصل السنين  
و بتوضا دم مع المجروحين  
و بتخان فأجرب طعم الخيانة  
و برقع بذل مع الراكعين  
و أعيش دنيا غير اللي كانت معاي  
فأعوذك مع كل شك بيقين  
و أفارقك فأشوفك في كل اتجاه  
كأنك صلاة للمسافرين  
و عشان أبقى فارس في الذكريات  
أنا لسه بكبر  
و أحن في ساعات  
و سايبك عشان  
متعشيش اللي فات !

## مش بيتفسر

بنام وأقلق  
و أقوم عرقان و متكسر  
ولسه الحلم مش عرقان

لكنه مش بيتفسر  
على سجائري والدخان  
بفتح عيني على الدنيا  
كمصباح علاء الدين  
نفخ دخانه كده في السقف  
وقالي ليك من الأمانى ألف  
لكن علشان تحققها  
ده يعني يجوز مجرد سخف  
وأغمض عيني من تاني  
وأقول اليوم هيختلف مرة  
ويغلط ومش هيعرفني  
والأقي قصادي دي السمرا  
فتيجي مني تخطفني  
وأروح وياها بسعادة  
ومتزهدنيش  
مهما شافتني في إعادة  
وريحة القهوة ندهاني  
فأفتح عيني على المقدور  
وأقرا فيها فنجاني  
وأعشم ضلمتي بالنور

أنا عادي في يوم عادي  
فتأخر بحكم المرقعة فيا  
وحكم إن مفيش دنيا  
بتيجي معادها بالثانية  
أنا أصلاً

مجتش الدنيا في معادي  
ولا كانلي معاد ثابت  
بحكم إن مفيش مواعيد  
بتبقى عشان تكون سابت  
في دنيا إيقاعها متلخبط  
تطبطب لو في يوم ثابت  
وترجع تاني تحضني  
مع إني فيا متبعتر !

## أنا فاضي

ككل شئ بيتركب  
على هيئة بنا اتهديت  
ككل رسم على حيطان البيوت  
بفرشة بويه أنا اتغطيت

أنا فآكر  
زمان كان جوا مني أنا  
قعدتي تَغِيرِي منه سنين  
وقملي من هواكي جوايا  
ومسألتش أنا طاب فين  
لحد ما كل حياتي بقت انت  
لحد الوقت اللي معاه سبتي  
فما بقاش جوا مني أنا ولا انت  
أنا فاضي  
وبقيت ماضي في قلب حزين !

## تقريباً

تقريباً ..  
فيه حد معدي من إمبراح  
على بكره فقام عدى عليا  
سلمت عليه وحكيت وياه  
وغنينا سوا كام أغنية  
وحكالي عن كل ما فاته  
فسرحت شوية في حكاياته

بصلي قالي مالك سارج  
متعشم ترجع لإمبارح؟  
وقبل ما أجابوه رد عليا  
لو كانت تستنى شوية !

## لون بهتان

مسير الجرح والأحزان  
هتتعود على الفرقة  
مادام القرب مش ببيان  
من الفرقة اللي مش فارقة  
وأطمئن نفسي بالسجان  
ما قلبي كان يادوب سرقة  
في حكاية كلها بهتان  
كموته في منتهى الرقة  
بترسمني بلون بهتان  
وترمي اللوم على الورقة !

## دلّق القهوة

لفيت لفة  
ورجعت سكنت في نفسي إيجار  
بسجايري وكتبي وكام نوتة  
كنت بشخبط فيهم أشعار  
وفناجين القهوة المدلوقة  
بتلون فيها فيبقوا قدام  
فأقدم وياهم وأتلون  
وأرجع كل ما أطلع قدام  
والشتا والبرد خلوني كبرت  
لكني معتق للدفا ذكرى  
كل ما أعيشها بلاقيني سكرت !

## فوازير

وبخبيني  
عن عينكم وساعات عن عيني  
وبخاف على نفسي أتفرج  
فتقول بتهرج وريني

مين رافض فينا  
ومين قابل  
وكأننا بقى زي اتنين  
ولأول مرة بنتقابل  
واللقا بينا  
بقى أصعب ليه من أي فراق  
كان عندنا حلم  
بقى زي كابوس مع واحد فاق  
فبقى يبطل ليا أنا يشناق  
ويبعد عني  
مع ذلك بقى بيعشني كتير  
م أنا حل بقيت مليون فوازير !

## أنا البدايات

كأي غريق بيتعلق في دي القشة  
وأدور ليها من موتي على شفاة  
وأضيع مني وأرجع ليا بتمشى  
وأعلق ذكريات بايته بشماعة  
وأعد ناقصلي كام ساعة

على العقرب يلف الدائرة مقفولة  
وأنام فبشوفني ليه لسه في سنة أولى  
فبتعلم ولا اتعلم وبسكت زي ما اتكلم  
أنا اللي بهت في المشهد  
فبعدي زي ما بقرب  
في حدوتة حكنتي الجدة متغرب  
أنا البدايات لكن نهايتي مفتوحة  
لكل جميلة جت ليا وهتجرب  
أنا اللي نمت قبل ما جدتي تنهي  
عشان ألقاها في الحدوتة فتقرب  
أنا اللي حكيت حكاياتكم في يوم فيا  
وأنا اللي فضلت في كل نهاية مستغرب !

## بلكونة

أنا كنت بشب لجل أتفرج  
ع العالم والناس من تحتي  
أنا شوفت الدنيا كتير من فوق  
كانت أجمل  
فحضنت صورتها بحكم الشوق

وكأني صعبت  
على غسيلنا من فوق الأحبال  
فكان بيغمي صورتها في عيني  
ويقولي اوعاك  
تعشق فيها دي مشيها بطال  
يا غسيلنا حَقْكَ على عيني  
أنا أصلي زمان شُفت بعيني  
فخطفتني ألوانها الزاهية  
وبنات حلوين بعيون ساهية  
وما فُقتش غير وأنا في الساقية  
مربوط ومكتوبلي السكة شمال !

## حُضن المرَايات

على آخر مدد الشوف كانت  
على طرف المرتبة يوم نامت  
ومرايتي كانت ترسمني  
وتقول مش يمكن تقابلها  
فأقولها دائماً تتمني  
وتقولِّي غاوي تنيلها

وفقري ومش مكتوبلي أشوفها  
وأرسم ملامحها وأوصافها  
حضن المرديات غير حضن عنيك  
دايما بتوضح في الصورة  
مش بتخاف جاي من حد نسيك  
وبتحضن وتكون مكسورة !

## لكني نسيت

أنا قلب اتوجع جدا  
وعين الدعوة نسيته  
أنا أشطر بليد جدا  
فمن حبتني كرهته  
أنا كل اللي فاكره زمان  
بإني حد كان تاني  
ومع الأيام بقى ينسى  
ولسه بحاول أنساني  
أنا اللي فاكره بالتفصيل  
بإني كنت حد جميل  
في مشهد كان ملان بالقبح

لكني نسيت مع الأيام  
بهت مين فينا ع الثاني !

## زي الفل

الناس لبسوك  
وبقوا شبهك  
فده قرب منك  
وده حبك  
فلقيت الكون طيب جداً  
وفرحت بجهل  
ونسيت إنك حليت الصعب  
وكنت بتغلط دائماً في السهل  
الناس لبسوك فاتلّونوا بيك  
مع إنك أبيض زي الفل !

## وبالتشكيل

أنا مكتوب وبالتشكيل  
بضم الفرح بس قليل

ومفتوح قلبي للعالم  
بكسرة تميل معها بميل  
وبتشكل لكني فيا بتشاكل  
وقلبي نص صريح فعلاً  
يجوز جداً معاه التأويل  
أنا اللي كتبت اسمي غياب  
عشان مكانتش يوم في الفصل  
وأنا اللي فرحت لما باستني  
كأول اسم بيبقى فعل  
أنا اللي غلطت  
لجل تطلع الأولى في يوم ع الفصل  
أنا كام فصل  
أنا كام بيت كانت بتسمعه فتميل  
أنا آدم  
فجابت بعدها حوات  
فكنت ببكي في الصوات  
وأقول يا قابل الدعوات  
اغفر ذنبها فيا  
أنا اللي دعيت عشان الجنة تحضنها  
فتبقى حاضنة كل جميل !

## علشان تكمل

وبما إنك يعني يا دوب واحد  
مش ناقص منك  
علشان تكمل  
غير فرحة كانت يوم وياك  
وبنت بتقول أنا هستناك  
وفي بعدها قالت مش هنساک  
وأحلامك ..  
قبل ما تتخلى وقبل ما تسيب  
وبراءة لقميصك من الديق  
وتفكيرك لما يغيب فتغيب  
وحبة راحة بدل التعذيب  
فعليك واحد..  
مش ناقص منك غير واحد!

## كيس بوزو

أنا كيس بوزو

ولوليتا ودوم وغزل بنات  
أنا دكة سيما جمعنتي يوم ويا البنت  
أنا سنة اتوجعت  
واتاكت م الحلويات  
أنا فرحة اترسمت على وشي  
يوم لبس العيد  
أنا فسحة  
خدتني وياها من غير مواعيد  
أنا عشت معايا في يوم الفرحة  
طاب ليه لقيتني في الحزن وحيد!

## سلام على المرديات

سلام على كل شئ ودع  
وسابله ذكرى ويايا  
عشان بالذكرى يوم يرجع  
كأنه صورة في مرآة  
بتعكس وشي ووشوشهم  
في كل صباح فأشوف نفسي  
فألاقي وش كان طيب

يقول نرجع أقول نفسي  
وألاقي وش بيشوش  
على كل الوشوش حواليه  
فأقول طاب خدت منك إيه  
غير إني بكيت على نفسي !

أنا

أنا السيد  
فلا أنا كافر ولا أنا مطيع  
فيبقى إزاي  
أعيش في قطع  
أنا الغلطة وأنا التغيير  
وأنا التصحيح وأنا الترقيع  
وأنا في آخر كلام ليا  
بحط اسمي مع التوقيع  
وبفرح لما بملك شيء  
لحد ما بزهده فيضيع  
أنا قبل الأنا ما تكون  
كأي عظيم وأي وضع

أنا اللي كنت حافظ نص  
نسيته في حصة التسميع!

## فتيش

أنا زي فتيش  
وأعمالكم بتموت فيه  
من غير السحر  
أنا مفعول بيه  
بأفعالكم وبصيغة الأمر  
أنا عمر انتهى فجأة مخدنيش  
وعشان اللعبة طرف واحد  
ممسكتش زهر!

## فيكفيني

بعّد الباقي  
على عدد أفراحي في الدنيا  
وبشتاق لكل حاجة لسه مجتش  
وقدر يعني ما حصلتش

فيكفيني  
بإني عشت مشتاق ليها لو ثانية  
ويكفيها بعد البهدلة عني  
أنا حاضي  
في وقت ما كنت متكسر  
بواسيني بحكمة مني وتأثر  
أنا وحدي  
لكني ساعات بكون أكثر  
وبفضّل ساعات بُعدي  
فنتفارق ونتبعتر  
ونرجع تاني نتغمي  
ونتقابل على الأمة  
أنا أغرب غريب عني  
وأقرب حد في يوم ليا!

## الساعة ستة

الساعة عدت نص العمر  
وبتشاور على النص الثاني  
ولسه بعشق غزلك يا بنات

وبقول حكايات  
محصلش منها ولا حكاية  
الساعة دقت جوايا  
كمعاد ثابت  
لآخر ماسكة فيهم سابت  
لفت عقرب  
فلدغ عمري وقع نُصه  
الشعر كره معناه نُصه  
وأنا لسه بمص في كيس التمر !

## قرب تغيب

قرب تغيب  
البعد كان قسمة ونصيب  
والقرب كان محتاج حبيب  
شكل الدفا  
ياما شكلك أشكاله  
حضنك يا أمي  
الحكايات اللي كانت  
بتتحكي وقت أما أخاف

نومتي لوحدني  
وتكتكة دفا اللحاف  
البرد والخوف من الشتا  
خوف العمى  
ورعب اللي قرب يوم فشاف  
قرب هتبعد يا جدع  
شوف كام غريب  
بالقرب منك صبح غريب!

## إنسان

بقي فيك أحزان  
وأفراح وبتفرح وياها  
مجدوب بالفرحة اللي لقاها  
بيتها في حضنه وغطاها  
دفته م الوحدة وم الحرمان  
بقي فيك قلب وبيدق ساعات  
وبيعطل زي ساعات بتبوظ  
بقي فيك قمصة لما بتتقل  
على حلمك لما بتضرب بوز

بقى فيك ذكرى وبكره ونسيان  
حكايات تحكيها في كان ياما كان  
بقى فيك إنسان !

## كبرت

وهتعرف إنك كبرت  
لما هتنييم  
أقراص الدوا مكانك  
ولما تبطل تصدق  
ياريتني أنا مكانك  
أخرتك دعوة  
الموت ما بيهزرش  
والوحدة مش حلوة  
وانت اللي بتهزر  
لما بتكدبها وتصدق  
ما الصعب أهو جالي  
طاب إيه هيجي أكثر  
والرعدة بتموتك  
كرعدة أول فراق

وأول ليلة قضيتها  
ما بين الكره والاشتياق  
وكل ما تعرف  
هتلقى الوقت متأخر  
فتبص فوق للسما  
وتقول أنا حنيت  
ما لقيتش فيها رجا  
من يوم ما أنا هليت  
والبصة معناها  
أنا بس بستفسر!

٥٠ تذكرة سوق سودا للفيلم

## قرب

فيكي حاجة مش عارفها  
عارفة فيا كل حاجة  
عارفة فرحي يجي إمتي  
وإمتي يبقى حزني سادة  
حاسه حلمي معاده إمتي  
حاضنة نومي بالسعادة  
صاحية يعني قبل ما أصحى  
صابحة وحضني فيكي بايت  
وكل كلمة ليكي واضحة  
رغم إن كلامي ساكت  
فيكي حاجة هادية فاضحة  
مشاعري لما هتبقى عادة !

## دعوة

جيت أضمك في الخيال  
قام زعل وخاصمني جامد

## لهفة

ملهوفة للشوفة عنيا  
لو نظرة بيتغير حالي  
وأما تخيبي عليا شوية  
بتبقي معايا في قلبي وبالي  
في سلامك تحلاي الدنيا  
ده البسمة بترسم موالي  
والدمعة لو منك غالية  
تسهرني في الحزن ليالي  
ومحبة قلبي بحنية  
تملاك قلبك لو خالي!

## تشكيل

يبقى يعني الطيف يحن  
لما يتشكل بإن  
يبقى إنس ويبقى جن  
تبقى تمثال للمحبة

اللي صنعه ساكنه جن  
تبقى ليا لحن فرحة  
عمره ما بيعرف يئن  
تسكني كل القسايد  
تستحلي كل حزني  
لما تيجي وتحضيني  
لما يتفتفت في حضني  
وتلعني عمري اللي فاتك  
وتعلمني اللي جاي مني  
وتغزلي وحدك يقيني  
لما هتجيني وتحني  
وتعشقينني .. مش كثير  
على قلبي قلبك لو عشقني  
وتنقشي في قلبي رسالتك  
بس ده لو يعني إن !

## رهبة

طاب هاتي كلام ينفخ يتقال  
في قصيدة حب أكتبهولك

قولت أجرب في الدعا  
تبقى ليا ونبقى واحد  
فكنتي دعوة ليلي كله  
لما كنت بطوله ساجد  
فقيسي من كل الزوايا  
شوقي ليكي تلقيه واحد  
زي دعوة في سماها تبعد  
قريبة من قلب زاهد !

## نظرة

من نظرة لنظرة الشوق بيان  
بيدق بيان  
ميت فيكي وعائشة معايا  
وجوايا ساكنة في كل مكان  
وإكمني لا شاعر ولا فنان  
فهشوفك من بين قسايدهم  
ومن بين رسوماتهم  
أنا هسرق صورتك م الألوان !

وكل من شافك قال الله  
وأنا شاعر حيلتي بس الكذب  
وبزوق يعني الوحشين  
مين قال الوصف وقت ما يتقال  
يتقال للأجمل م الحلوين !

## خلق

مين اللي قال إن المحبة  
جوا وردة وكلمة بحبك  
أو شعر يتقال على ورق  
وأنا لما بلمح حد شبهك  
بنسى كل الشعر فجأة  
و جوا مني بتخلق !

## حب

ووقعت في حبك  
نفضت هدومي فمالقتنيش  
مش حاسس من وجع الوقعة

غير بس بوجعك فضميني بحضن  
ميقعش في حبك إلا الشاطر  
والشاطر يلح في عنيكي الحزن  
مش هيكون أبداً يوم شاطر  
غير لما يشوفك ست الحسن !

## إعجاب

إعجابنا بيشبه طعم القرب  
في مسافة بعد متبعدناش  
مرتاحة قلوبنا كده م الغلب  
ومن عشم اتعشمناه فمجاش  
أجمل قصص الحب ما حصلتش  
ومكانش فيه حد ما استغناش  
وفراق مايع عمره ما فارق  
بيعيش في الذكرى ومنعيشهاش  
يا فراق ويا حب  
فيه حاجة بتجمعنا معاها  
يمكن إننا كنا ماكاناش!

## لجلجة

فهلجلج وتتشقلب حروف الكلمة في لساني  
بحبك آه هقولها إزاي وهوصفلك فمش عارف  
وهتججج بدور البرد وحتة في قلبي وجعاني  
وأكثر حد مطمئن معاكي .. بس أنا خايف!

## لخمة

من سؤالي لبكره جايز  
كان وجودك الإجابة  
ولا انت دعوة حلوة  
جت في ساعة استجابة  
يعني زي بونبوناية  
للبيد عرف الكتابة  
وكل حاجة جميلة فيكي  
زاد جمالها شوقي ليها  
يعني إيه مقدرش أوصف  
وكل حاجة فاكرها فيها

ما قلبي لخمّة في حبي ليكي  
بس فالح في الخيابة!

## ذنب

وانت قلب في قلبه حب  
تحضنيني و تبوسيني  
وليكي فارس تعلنيني  
ومن خصامك تلعينيني  
وليس بعد الحب ذنب !

## ندا

سمع الله لمن حبك  
ومن قلبه نده قلبك  
كطفل اتمنى أمنية  
كحلم في قلب أغنية  
ككل حروف غناويا  
بتتفرط لما بندهلك  
ونتلاقى فتطمئن وتتشبك!

## بوح

إزاي كان أي رسول ببوح  
مع إنه كان وحي بينزل  
وإزاي كانت الناس بتروح  
بقلوبها من غير ما بتسأل  
فيه رسايل من السما جايالنا  
بتططب وتريح بالنا  
وانت رسالة لقلبي المجروح !

## حزن

في الحزن في مرجحة المرجيحة  
القرب أخذ من البعد الوعد  
كنت بضمك تبعدي عني  
وترجعي تاني فبنحزن بعض  
وكل ما البعد يطول حبه  
كل ما الحزن يفوق الحد  
الحزن ده لعبة

الخصن ده جد  
بتقرب قلب لقلب بود  
هتوه من قلبك  
فهتلقاك فيها  
الخصن بيثبت إن انت بجد !

## وَحْشَة

نفس إحساس إني ضمك  
الأمان مالي المكان  
لما بسرحد جوه عينك  
وأصحي على ضحكة جنان  
وقهوتي بتدوق شفايفك  
ساده زاد سكرها بان  
وكل يوم الصبح بدري  
لما ليكي كنت بجري  
أيوة وحشاني  
واللقا بقى صعب تاني  
زي إحساس إني أقابلك  
في الأجازة وبكره آخر امتحان!

## واقع

ما أقدرش أقول اطمني معايا  
لكن خلىنا نخاف على بعض  
نطمّن أكثر فنخاف م البعد  
ونخاف من سكة تكتبلنا نهاية  
ما أقدرش أقول الحلم ويايا  
لكن أكيد عارف ما بينا فيه حكاية  
تنهينا م اللي فات وتخلقنا في بداية  
توهّتي كل السكك فبكره تلاقيني  
ما يقيني قبل اللقا شافك هنا معايا !

## ملل

من ألف طريق  
يوم كنتوا فيه  
فيه طريق  
كان حافظ خطاويك  
كنت بتمشيه وانت مروح

وتفكر بكره  
ما يغيبش عليك  
وبتحلم بلقاها من تاني  
وتقول فجأة والله عشقت  
والوقت يعدي في ثواني  
وكنت بتنسي وياها الوقت  
الوقتي الوقت بقى بينسيك !

## الحقيقة

مطمئن جدا لجراحك  
بحضنها في ذكرى ألاقيني ارتحت  
بشكيكي وبشكيلك منك  
وبحلم بكايا بلاقيني فرحت  
مش عاوز قربك ولا بعدك  
لساني يموت فيكي وعائش  
أعقل واحد بيكي أنا طائش  
علشان وياكي أنا كنت أعمى  
وكرهت حياتي عشان فتحت !

## بُعد

مادام البعد مختارك  
على لحنه تغنيله  
ولقيتي رفيق لمشوارك  
فبترجاكي حنيله  
وشوفي درب غير الدرب  
وفوتي طريقي لخطايا  
قابلتك كنتي أول ذنب  
وحبك آخر الخطايا  
ما أنيش آخر ملاك ع الأرض  
تنور جنته نارك !

## وحدة

وانت واحدة  
يعني أي واحدة بعدك تبقى وحدة  
تبقى يعني محاولة فاشلة  
وقلبي مش حمل المناهدة

بس كونك تبقى وانت مش معايا  
يبقى سببي قلبي وحده يعيش في وحدة  
عارفة أفكار الليالي لما تيجي الساعة واحدة  
اللي فيها بفتكر كل اللي كان  
واللي كان كله بينطق كلمة واحدة  
آه بحبك بعد بعد سنين طويلة  
كل ليلة بتيجي ليا وتحضيني  
وجوه حزنك أعيش في وحدة!

## ثورة

ولو غابت غيبها عن المشهد  
وقول زمان كان هناك شباك  
شخبط بقلمك ع اللي مش وياك  
الفرق في التفاصيل  
بتبان كل تفصيلة لما غيرها تغيب  
بتقربك المشهد  
مين الحبيب ومين خلاص بيسيب  
دقق بنظرك  
مش هتلقاها من الأول

الجهل أحياناً من الأول مهواش عيب !

## ضحكة

من كلمة واحدة ونظرة واحدة قوت هي  
والقرب كان مكتوب عليها ومكتوب عليا  
قالتلي إوعى تغيب بقى يوم عن عينيا  
واوعدني تبقى في حضني أقرب ما ليا  
ولقيت هواها قوت يعني الدنيا ضحكت  
حسيت كأني ملكت كل الدنيا ديه  
وحسيت بحيرة لما فجأة الدنيا سكتت  
ضحكتلي إيه ده باينها ضحكت عليا!

## حيرة

فارقت؟ فرقت؟  
لسه معاك؟  
كنت بتجري على شباكها وتستنأك؟  
رحت في يوم نفس المشوار؟  
بس رجعت بقصة حزينة وحلم انهار

قالت ليك مش هبقى معاك؟  
ما بقاش فاضل فيك نفسين  
زي سيجارة  
هي تاخدهم هي تسيبهم  
انت هتخلص في الحاليتين!

## صدمة

كلامك غير  
يهز الفرع فيميل بعش الطير  
يصيبه الخوف  
على الحلم اللي حلمه كثير  
يخاف ليشوف فيغمض  
يضم جراحه تتمرض  
يلاقي قلبك اتمرد  
فيتمرد  
ويبعد أد ما بتبعد  
ويمشي في الفراق مشاوير!

## تبرير

وأنا وانت نلف ونبعد كف  
بعدنا بقى أرحم شيء مألوف  
يانقرب بعضنا من تاني  
ونخاف م القرب وموت م الخوف  
القرب غريب والبعد غريب  
والحب أعمى بيحاول الشوف  
نتخبط وياه في الذكرى  
ونشوف بكره منقدرش نشوف  
ونخبط على بابنا في بكره  
أحلامنا ناسية مهيش فاكرة  
نتفارق وموت م الفكرة  
ونقول يعني أهو كان في ظروف !

## جرح

وآخر حاجة بتطمئن  
بقت خوفنا خلاص من بعض

نسينا الورد بقى يدبل  
مسكنا ليه في شوك الورد  
ونظرة عينا بهتانة  
قلوبنا جرحها إهانة  
وكان فيه حب جوانا  
يهد الكون يفوق الحد  
لكن بطل يحارب حد  
وداها فيه سؤال متشال  
و بنسكت لو عرفنا الرد !

## نقص

فتتملي  
وبتملي لقلبي آخر القصة  
في بعدك كان مفيش فرحة  
في قربك كنت ليه ناقصة  
وبالملي  
بقيت عصفور بتتحني  
بدمه في آخر الرقصة !

## فراق

غمضت عيني وفتحتها جداً  
زحمة دموعي غلبتني كام مرة  
وقت الفراق كنت حزين جداً  
ونفسي أشوفها من بين دموعي آخر مرة  
الفرق بين الفراق واللي حصل فعلاً  
إن اللي فاتني حد تاني بالمرّة  
وهي فضلت معايا في كل شئ  
في كل القصايد وفي مشاوير الطريق  
وفي كلمة بحبك لما أفكرها فتبل ريق  
غمضت عيني وشوفتها معايا  
الفرق كان إنها قررت ما تبان  
بس لما غمضت عيني  
قالتلي انت وحشتني جداً!

## مكابرة

سيبك مني هبقى كويس

وهتعود عليكي في ماضي  
ولو على قلبي  
هيجي اليوم  
بعذك راح يكون راضي  
ولو ع الحب  
وإيه يعني  
عشقتك بس ع الفاضي  
بدمع آه  
ومجروح قلبي قال الآه  
صعبت كثير على نفسي  
وهبطل حزن وأقول عادي  
ما أنا اللي رضيت  
في حدوتك أكون عادي  
هسيبك يلا تحكيني في حواديتك  
ف يلا سلام علشان قلبي  
لحتى عتاب مهوش فاضي !

دمعة

متصدقيش كدبي

ومتعرفيش غيرك  
إن الحياة حلوة  
ومتعاشة من غيرك  
أنا لما قولت بعيش  
كنت بعيش ذكرى  
ولما قولت مفيش  
علشان أجابو مالك  
خانتني دمة ونزلت  
من عيني على فكرة !

## ذكرى

لساهم ساكنين  
في حيطان البيت  
رسوماتك وانت بترسمها  
شخايبط عن حبك  
وكلام حواديت  
وأشعارك وانت بتحضنها  
سندة زهرها وياك ع الحيط  
وسجايرك

لما تاخذها وتطفيها  
ولسه بتملا الحيطه بجملة  
إزاي أنا هعشق بعديها؟!

## حضور

بين الفتارين ليكي هدية  
مالحقتش أجيبيها  
كنت بدور على فرحة  
في عينك وحاببيها  
وقصايد عشق  
قبل فراقنا جيت أكتبها  
فالحزن نقشها  
قصايد حزن وطفى النور  
وأنا لسه بحبك  
رغم سنين عدت بالدور  
وبرغم غياب القلب مع الغايين  
لساكي بتمضي في قلبي حضور!

## سهر

والوحدة بقت يعني معاكي  
ومن وسط الناس برجع بدري  
وأقولك ليه بس مشيتي  
ليه بس البعد مش كان بدري  
تخطفني عنيكي ومن تاني  
وبالذكرى ليلاقي أنا بسهر  
ولو قالوا الناس لسه بتسهر  
بكذب وبقول.. لأ بنام بدري !

## وقت

عدى عمر على آخر يوم مابينا  
وانت سايبة الذكرى منك عندي وردة  
كل يوم يسقيها شوقي بدمع عيني  
واسألها ده لسه عايشة للنهارده  
واسألني الذكرى تقولك جوه حضني  
بيها عشت وعمري ما حسيت بوحدة!

## حلم

كأني حلمت بيكي امبارح  
وفي قلب الحلم حضنتيني  
فنمت أزيد من المعتاد  
عشان أقولك وحشتيني  
ونمت كمان عشان أقابلك  
أنا آسف معنديش قصة  
من بعدك ولا قبلك  
ولو خيرني يوم البعد ووجع الصد  
بان تعودي لو ثانية أنا قابلك  
بحن لكل تفاصيلك في ملامحهم  
وتصعب نفسي على نفسي  
عشان مقدرش أصارحهم  
وبفرح لما تفصيلا  
في تفاصيلهم تكون شكلك  
وسألت الحلم فقال تحقيقي مستقبل  
وأنا بالماضي من حلمك بقيت بقبل !

## كسرة

أوراق الورد يا مكاتب  
يا عبير في أوان  
وخذلان من بعده ورق دبلان  
«الورد بيضحك شوفوا شوفوا»  
الورد حبيب ييموت لحبيب  
وبقطفة حب لف الدنيا  
وفي ركن الذكرى في الدواليب  
دبلان بقى خايف من خوفه!

## نصيب

عنيكي لما بعدوا في يوم  
وقالوا البعد يعني نصيب  
داريت من جوا عيني اللوم  
حبيب مهما كرهته حبيب  
تفارق دنيتي ألقاني  
كأني في حضن نفسي غريب

ياخذني شوقي من ثاني  
لذكرى كنت فيها قريب  
تعاند دقة من قلبي  
في دقة ساعة المكاتب  
تقولي بكره يرجعك  
لكن يعني في علم الغيب !

## موت

كل الكلام ..  
اتقال ما بينا في السكات  
أخبارك إيه؟ عايش  
وأخبارك إيه؟ عايشة  
أومال ليه بينا الحب مات؟!

## أحزان

كوباية القهوة بن خفيف  
وسيجارة بترسمها في دخان  
أشكال السما في ألوان الطيف

والذنب المعمول مش ندمان  
سألوني عليها جاوبت بزيف  
ده ملاك ومن امتى ملاك ببيان  
فقالولي مين جرحك غيرها؟!  
فجاوبت بقى كتر خيرها  
من غيرها إزاي  
أنا كنت أتغزل في الأحزان!

## لقا

كانت بتفرح  
لما ببص في عنيتها  
وأسرح وأقول  
كلام كثير ملوش معنى  
وأفرح كما الطفل  
لما بيلمح فراشة يلاقيها  
وأشتاق معاها  
كثير لفرحة تجمعنا  
وعدتني تبقى معايا  
ووعدت قبليها

ولقانا خان الوعد  
والوعد بقى وداعنا  
لسالها ذكرى هفتكرها  
بعد الفراق بيها  
فسبحانه الي خلق الفراق  
وفي الذكرى جمعنا !

## حنين

قلبت في الدواليب  
وبكيت..  
ما هواش عيب  
ومسكت هداياكي  
فبكيت عشان بعدك  
وضحكت وياكي  
وفكرت ليه البعد  
وإزاي كده استغربت  
كان كل شئ بيقول  
إن انتِ طول الوقت  
بتحضني قلبي

وترسمي الدقات  
فإزاي أكذب حبي  
وأصدق النهايات!

## تشكيل

وقت اللقا بشتاق  
يا فرحة لون فستان  
يا ضحكها الرنان  
يا عقل تاه في جنان  
يا كل حاجة حلوة  
اتشكلت لفراق!

## كره

متجنيش في الحلم تاني  
وروحني زي ما كنتي رايحة  
ايه هيعمل عمري بيكي  
مش هتبقي لفرحي فرحة  
مش مآمن

بيكي لما كل شئ ينده قدومه  
زي كافر ع الصراط  
كان معدي يشوف جحيمه  
ومن صديد جرحك  
قلبي داق بعدك نعيمه  
وانت ذكرى مسلسلاني  
بس عيني في رؤيا طارحة  
شجرة تانية من الغواية  
تطرد قلبي من جنة جارحة  
لما بعدك كان لقربي  
الشیطان اللي غواني!

## أنين

دَقْتُ إيدين الذكري باي دُقت خوف  
حبت ترجع حب كان بينا انتهى  
حبت تقول حبة كلام عن الظروف  
وإزاي طيور العشق بتهجر عشا  
لكنها بترجع تحن.. لكنها بترجع تطوف  
حوالين قلوب كانت حياتها كلها

واقف ورا الباب مستخبي من اللي فات  
جرب بقى إحساس تموت بعد الملمات  
نفضة حنين كأنها الرعشة الأخيرة  
لقلب بطل نبض وارتاح من سكات  
والذكريات استكترت عليه يموت  
فقالته شوف ..  
كل اللي فاضل ليك أنين لحد المنتهى!

## نداهة

الذكرى زي النداهة  
بتنادي عليك  
وبتخطف قلبك وياها  
وتقولك أنا ماضي وعشته  
حبيته أكثر ما كرهته  
أنا حلمك بس أنا ضيعته  
وسبتك مع نفسك في متاهة  
طيب لو يعني قابلتك يوم  
واتعادت ليك نفس الذكرى  
هتقابل نفسك من تاني

ولا راح تهرب على بكره  
أنا فكره عشتها هتعيشك  
وحلاوتي غباوتك أو طيشك  
أنا بردي في يوم نتف ريشك  
علشان في الدفا تتمناها  
أنا حد آمنته قام خدعك  
وطبيب قررت ساعة وجعك  
إن انت تعيش بعدي بعاهة!

## قبح

كان نفسي يعني فراقنا  
يبقى فراق جامد  
مش كلمتين هايفين  
وحد بقى بارد  
تقول عليا إيه القصص  
لما تحكييني  
وقت الفراق استشهد  
ولا .. مسكين بقى يا عيني  
تقول عليا إيه القصايد

وكل البنات قبلك  
والله قلبي انكسف  
إنه في يوم قابلك  
حتى قصيدة فراقك  
كلماتها أهو تافهة  
ومش لاقى حاجة عدلة  
في فراقنا أوصفها!

## رعشة

لأن الفراق الحقيقة الوحيدة  
في قصص المحبة ولو تختلف  
ولأني كدرس في وقت امتحانك  
من منهجك لزم يتحذف  
ولأن بدايات المحبة دفا  
بقيت في نهايتها خلاص برتجف  
بقيتي لقا من فراقك بطيفك  
فبنكر وجودك لكن بعترف !

## اللعبة

من بعد ما عدى العمر وفات  
لسه أنا عايشك لحن بيانو  
لسه بشوفك زي الحكايات  
وتسهري في عيوني لجل يناموا  
ويتغزل شعري في غزل بنات  
فيدوقك سكر في لسانه  
ويجيبك من ماضي لحاضر  
وكأني بلعب بميكانو !

## اكتمال

حتى إذا بلغ الفراق اكتماله  
وبطلت أقرأ في الرسائل  
وكل شوقي راح لحاله  
وسكنتها الذكرى جمائل  
وشوفتها كأول مرة أعرفها  
المعرفة أحيانا

في قلوب بتخطفها  
لكنها من الجنة طردتنا  
فبدا ليا في حقيقتها أوصافها!

\*فيلم الموسم وكل موسم\*

البلد اللي هتلق تعشقها  
في الطيارة

## بهية

يا بهية لسه حبة؟  
ولا حابه اللي فيه ده ومستحبة؟  
شوية عملوا الحبة قبة  
وشوية حرب بندقية  
وشوية شعارات في القضية  
وشوية ماتوا لجل تحيي  
قومتي قايلة لأ.. شوية !

## وطن

مليش غيرك وطن في البطاقة  
وكوني بحبك مفيش ليها حل  
وكونك بتقسي فأنا ليا طاقة  
بتعلن إن البعيد شكله مل  
يا ساكنة في قلبي وراسمة البراءة  
وقلبي مصدق فدايق في ذل  
و ساجنة حبايبك وكاتبة البراءة

لكل اللي نهيك وقال سجنني حل!

## جدع

في لون الحاجات  
في قهوة وشيشة  
وضحك البنات  
في قلب اللي راحوا  
فجيت من سكات  
في غنوة فرح  
لونتها النيات  
بحبك فأطير  
وأعيشك فأقع  
بحب البنات  
بحب الدلع  
وأحبك يا بلدي  
في وقت الوجع  
ووقت المظاهرة  
هتفت لسكات  
وصحيح بنضرب

بس بعمل جدع !

## ملكيتني

لعشقي بتوعي  
ولقلبي يهون عليك ليه إوعي  
ده عاشقك قبل ما توعي  
وقبل ملامحي ما تنبت  
في حضنك كنت أنا متبت  
لقيتني م الهوا مقرب  
ولما خطوتك دبت  
لمحتك .. حياتي فيا انا دبت  
بقيت وياكي مش ويايا  
بقيت من نفسي مستغرب  
بعدتي كثير من قبل منتقابل  
وأنا قابل يقيني في قلبي بيثبت  
وكنتي مهما كنتي بعيدة  
من قلبي أكيد أقرب  
ولما لقيتني من نظرة  
ملامحي كلها لبت

عرفت إنك ملكتي  
وقولتي مهر محبتي  
تبات منبوذ ومتغرب  
سألني الناس عن القصة  
حكيتها وقلبي متشتت  
آمنت بحبها كما المحموم  
بلدغة غدر من عقرب  
ووصلتني وصلتي  
وصلبتي وصابتني  
وقالت لو يقرب ثاني  
هواك من قلبي ليحرب  
فخفت منها فاطمت  
لسكة بعد ندهتني  
هربت لحد لما تعبت  
لقيتني لحضنها بهرب!

## ثورة

وقلبي مل  
منك لما

حبك قل  
بقيتي بترمي أحلامي  
في قلب الطل  
وتجري ورا اللي خلاكي  
تكوني اقل  
من واحدة تبيع  
الفرحة والضحكة لولاد الـ..  
حبيبة من هنا لبكرة  
ومهما تقسي مش هكره  
ومهما تتوهي وياهم  
أنا الحزن وأنا الفكرة  
وأنا الشعب اللي ثار  
لجل تشوفي النور على فكرة  
وأنا الدم اللي سال  
على كفوفك لجل تتحني  
وأنا الشهدا.. أنا الثورة!

عن الفرحة والألم

لأن الليالي في بعدك وجع

لأنك حبيبة وحببيك جدع  
بتشكي وتبكي وتيجي وتحكي  
فأخذك في حضني  
تزيدني القسية وأشوف البدع  
وقلبي بيشهد إنك حياة  
ويعلن شهادتي عشانك حياة  
ياساكنة في قلبي بعد الإله  
وباقية ولو ألف غيرك وقع  
وعشقتك يعدي طابور الصباح  
في لحظة ما كنت بحيي العلم  
يطير فوق سنيني وكل اللي راح  
ويحضن ساعات الفرح والألم  
يقولي ياواد مافيش قبل منك  
عاشق عشق غير وقلبه اتظلم  
وشرب م المحبة فداق م الوجع!

## نقش قديم

أيامي في حبك معدودة  
محتاجلي حياة لو مرة تموتي

ومحتاجة ممات لحبيب منسي  
وكلام العشق طفاه سكوتي  
وملا كاسك دمي اشربي وانسي  
ملعونة بلعنة دم شهيد عشقك  
وملعون إن كنت  
هفكر تاني إني أحبك  
وبحبك .. أيوة .. أنا بحبك  
وانت لا حباني ولا سمعاني  
ولا فهماني ولا حساني  
وفالحة تقولي إن انا ابنك ؟  
ابنك ؟  
قتلتي كل ولادك في صباحك ؟  
واديتي كل من خانك مفتاحك ؟  
اكني يعني عشقتك  
تصبح ايامي أنا سودة ؟  
خليكي انسيني خليكي اقصي  
وتصبحي في الغدر وتتمسي  
وأنا شاغل حلمك من ياسي  
أنا نقش قديم على باب منسي!

## غنيت

على كل لحن م الغنا غنيت  
وضحكت فيكي لحد لما بكيت  
ورسمت فيكي ألف مدنة وبيت  
ورسمت بيكي حلمي فاتهديت  
بقعت لبسي في حزن شجر التوت  
عيل ف حارة كان بيلعب توت  
قطر السنين عدا وكان بيغوت  
عدت سنين لكن لوحدي بقيت  
حدوتة والحواديت حكيها بقى ويل  
طلت السما ما جبت قمر الليل  
أنا تهت فيكي ولا بان لبكره دليل  
وتُتهت بيكي ملتي ولا مليت !

## طرف واحد

حطي عشقك جنب عشقي  
تلقي عشقي حصري

انت حلم حلمته بس  
خسرته لأني مصري  
قالوا عشة جنب نيلك  
تبقى هي قصري  
بس فين أنا م العشة  
واختفائي قسري  
قولت تحيي قولتي موت  
مت مش بخاطري  
عشقي ليكي لجل تحيي  
قولتي حياتك مهري  
من طرف واحد عشقتك  
زدتي ليه في قهري  
ورفضتي عشقي ليكي قصاد  
كلام واحد بيهري!

## صُوان

وكل شيء  
بقي ليه صوان بيموت  
الحب وقت الجواز

وعزيز عليك بيموت  
وأحلامك اللي عشانها  
جربت يوم الموت  
بقت خلاص متباعة  
من ناس بتدي الصوت !

## حلال بلال

حلال بلال  
طلع بلال  
وأذن الثورة حلال  
يا شعب ثار  
على طلق نار  
ليه راضي بالسكة الشمال  
فاستكنتوا أم فخننوا  
أم يأستوا أم رقصتوا  
ولا يعني العيشة نستو  
وانتوا بتربوا العيال  
فيكو مني وفيا منكو  
وفينا منهم كام خازوق

وهو داخل شهم ذوق  
قال هتبقوا بكره فوق  
فوق خازوق امتى نفوق  
ولا يعني كيفنا عال!

## غطا الإزازه

غطا الإزازه واقع وضايح  
تحت الترابيزة العجيبة  
متخبي فيها وعاملي صايح  
مش ملتزم بنظام غريبة  
هو صحيح فرحان بنفسه  
إكمنه يعني عارف يلف  
فلة تسد أتخن إزازه  
لو افتكرت نفسك مهم  
يا أبو عقل خف  
ولو انت واقع  
أو حتى ضايح وعاملي صايح  
أنا هبقى ليك خريج صنايع  
وبدل ما أجيبك هقلبها فازه

وانت مسيرك لجروف معفن  
ووقت الكنيس تبقى الجنازة!

## دم فلان

الدم دمك ولا دمي ولا دم فلان  
الدم غرق كف من ضحى نقش حيطة  
الدم غرق لبسي مت أنا وعلان  
مين فينا الشهيد ومين اتنى في زيطة  
مين فينا كان حلمه يكون إنسان  
ومين اللي شاف الفكرة تافهة وعبطة  
الدم أيام الطفولة خروف  
أضحية بنقش كفوف على الحيطان  
تعويرة بشوفها أموت م الخوف  
وعدو مقتول على حدودي لأنه جبان  
الدم بقى مالي الشوارع ليه  
بقى سهل تبريره خاين وشهيد  
يستاهل ونستاهل بنحكي في إيه؟  
والموت بيقتف مننا عناقيد!

## توابيت

كل الكلام حواديت  
هنهيص شوية ع الحدث  
ونقيد شموع مليانة حزن  
مين فينا ميت  
اللي مات  
ولا اللي بات جوه البيوت  
وكل البيوت توابيت !

## حداد

أسقي همومي محبتك فاحيا  
تزيديني هم وتقولي اوعى تموت  
وانقع كلامي في السكوت وانخرس  
وانقع هدومي في الدم ثم أموت  
وارفع في علمك وأقول بقى تحيا  
واتلف فيه في وقت لما أموت  
موتني عشقي ليكي فلم أحيا

وإيه تعمل رصاصة الغدر بعد الموت؟!

## ناقص مفيش

ناقص مفيش  
هتعيش تموت  
هتموت تعيش  
وناقص مدني للعصيان  
لكن خايف من العصيان  
فيقوم يبديل  
وهم الخليفة  
ببيادة الشاويش!

## كراسة رسم

هاتوا كراسة رسم وألوان  
والعلبة تكون ألوانها جديدة  
- موضوع اليوم  
نبدأ مع بعض سنة جديدة  
« كل عام وانتم بخير »

أنا برسم زرع وخضرة وقمره وشجرة  
والناس فرحانة وسعيدة  
- موضوع اليوم  
«الروح فداؤك يا وطني»  
حرب .. مدافع  
وأنا جندي مجند وبدافع  
عن أرضي وعرضي  
وهموت وأنا واقف مش واقع !  
- موضوع اليوم  
« الدين سماحة ويسر »  
من شال أخضر لعمة وجبة وقفطان  
الدين ده سماحة بدون سجان  
يلا نصحح كل الكراريس  
ونقول للميس  
كل المواضيع موضوع واحد  
فإزاي قسمتها لمواضيع  
إزاي قسمتنا لألف قطع  
رد زمايلي روح قول للميس  
كراريسنا مش حمل التقطيع  
أنا روحت وقولت

فبقيت كمثل متمرّد لازم هيطيع  
ضحكوا عليا وقتها جدا  
وضحكت كثير على كل قطع!

صمت

من ضمن ثوابت متغير  
شخبطة ع الحيط  
ولع في الغيط  
نطاط الحيط  
يا بيتنطط يا يموت وبصمت  
والصمت في محضر أقواله  
خلاي بصمت !

خيال القش

شكلك بتغش  
وتخبي الواد وبالبنّت تقش  
وبتلعب شايب مع نفسك  
وتنفذ حكمك من نفسك

وتمجد إيدك من حبسك  
يا خيال القش !

## للنت والقاش

وأنا اللي كنت زمان  
برسم في كراريسي  
قلوب للنت .. والقاش  
ومن علم المحبة توب  
وبنت بتغني  
وعلى غصن الزيتون  
حمام بيتعاش  
أنا اللي كل كراريسي  
اتقطعت مني  
عشان .. كان الورق بايش!

## وكان نفسي

شهادة القلب يشهدا  
ويستشهد ما تحضنينيش

يا خالقة سيرتي من سيرتك  
وكاتبة سيرة الدرويش  
بدمي لما كان خطك  
صلبتيني ماصلتينيش  
حرقتيني بنار عشقك  
وحتى في موتي مارحمتيش  
منعتي حدادي لجل حدادي  
يمصوا في دمي كالخفافيش  
ووزعتيني كام قرصة  
وقتلتي فرحة المناقيش  
وبصمتيني ع المحضر  
في قولتك لأ ما تعرفينيش  
م أنا فيكي بموت فبموت  
وكان نفسي أموت فأعيش !

بنك الحظ

وببلاش  
وقبل بيعها في المزاد  
اليهوذا قال بكام

واحنا فرطنا في بلاد !

## غريب

أنا كنت قريب  
ولحد قريب كنت حبيب  
أنا ياما حضرت كثير حصصك  
وفهمت الدرس فلقتني بغيب  
أنا واجب عيدته في كذا ثورة  
أنا حصة دين بهلال وصليب  
وجرس مرواحي ده شهادة  
إكمني عشقتك بزيادة  
من مات من حبه ده عباده  
وشهادتي لأني بقيت كغريب!

## بردت يا يناير

يا شعب كان تاير  
الثورة والثوار  
استشهدوا بموتك

بردت يا يناير  
من بعد ملة دفا  
وسط الميدان والصفاء  
نور الميدان انطفى  
لما الهتاف اختفى  
م البرد كان بيدور  
في ملتنا على صوتك!

## يا حمام

يا حمام  
كان طائر فوق البرج  
لفيت على بيتنا سبع مرات  
وسمعت تلاوتي في الصلوات  
ولمحت هدومي فوق بدني  
مطلوقة ببخور الثورات  
ومع ذلك كنت بتركع ليه  
وتنزل تنقر حبة حبات !

## رؤيا الخليفة

رأيت  
فيما يرى الصاحي  
في تفسير رواية رؤيا الخليفة  
بان العجاف اللطاف الخليفة  
هتعدني حتماً  
والديك هيدين  
وإن السمان في الكروش النضيفة  
وعشان حلمه طمني فبطلت أخاف  
فمبقيتش محتاج لشد اللحاف!

## حدوة

طول عمره بيشجع  
اللعبة لو حلوة  
طول عمره بيدمع  
على نعمة الغنوة  
ومع إنه كان أعمى

شاف الحياة حلوة  
طول عمره كان بلجام  
لكن بدون حدوة !

كَبَد

كَبَد  
مخلوق ولد  
يادي البلد  
ويادي البنية  
اللي في فراقها  
أحد أحد  
ويا دي الخطية م المحبة  
اللي عشانها بنجلد  
وأنا زي طوب من طين  
كان شارب خضار  
مدهوس بكل قدم  
م الذكريات والألم  
منقوش برسم العلم  
محبه بتهدم

وصلابته تتقوى  
لما يقيدوا النار!

المجد الابتدائية المشتركة  
( فيلم العيد )

## آخر محطة

وصلت لدرجة من الحكمة  
بقيت بشبه  
ظهر طبعة الكراريس  
بقيت زي الملقن  
لما استخبي في الكواليس  
وزي حكمة ورقة نتيجة  
اتقطعت فاترمت  
فرمت معاها  
الزمان والحلم والكوابيس  
أنا آخر محطة وصلتها فيا  
بعدين نسيتها عجلة الأتوبيس!

## مش حافظ

خوفي من دوري في التسميع  
ويا اسمي انزل بقى في الكشف  
هات قبل منك من الأسامي ألف

وأنا اللي مش حافظ م القسايد غير  
كل اللي كاتبه في عنيتها وإني بغير  
يا دور بقى فوتني لو جيتني  
وما تكسفينيش قدام اللي حبتني  
كل التلامذة قبلي بتجاوب  
وأنا اللي وحدي عنيتها سألتني  
تلميذ بليد في المحبة و قسايدي خذلتني  
يا دور بقى تعالي وخلي السؤال عنها  
تبقى الإجابة عن عشق فاق الوصف !

## مقرر

كل المحذوف بقى إجباري  
في مقرر عشته مع الأيام  
تربيتك كانت بتداري  
عن عينك كل الوجد الخام  
والواقع لما قررت تعيشه  
عاشك بغباوته وبطيشه  
فجريت تداري في الأحلام!

## القصيدة

يعني شوفي كده وقولي  
ومن القصيد هاتي ألف  
بس فيه معنى حقيقي  
عنه يعجز أي وصف  
ما تلوميش على شعري يعني  
شعري مش أد المقام  
وانت لو وصفك لساني  
أموت شهيدك  
ويعملولي كمان مقام !  
ما تقوليش على قلبي حبك  
قلبي لسه نونو يحيي  
وانت مدرسة الغرام  
لسه كل نبضة منه بتستهجي  
حرف في اسمك  
ومن شفايفك لو هدوق  
وقتها يكون الكلام  
انت أصل الصورة يعني

واللي كتبوا عن جمالك  
في القصايد كل واحد منه شف !

## تسوية

وسط كراستي الجديدة  
على الشمال  
جه مدرس الحساب  
شد خط  
وقال هنا تعمل حساب  
هنا التسوية  
يوم لقانا  
كنت أنا ضمن الغياب  
كنت عايش  
دنيا ملهاش في الحساب  
كنت ماشي في قلب شارع  
سكتين ذهاب إياب  
بس لما حسبتها  
وجيت كتبت المسالة  
كان الجواب

ولما شديت خط  
كنتي ع الشمال ويا العذاب  
وفقت على صوت الجرس بيعلنك  
حلم تايه أو سراب  
والحصه كانت  
من دروس كتير جديدة !

## فضفضة

لو كت تجيب الفضفضة  
ما قد مضى  
كنت حكيت  
على اللي راح م الجاي  
لما يسيب م المشهد  
صورة فضا  
لو كت بتنفع  
كنت بكيت  
أو حتى صليت  
كام ركعة قضا  
ودعيت بدعوة

ما يدعيهاش مجذوب  
إزاي تنادي الفرح  
من قلب جرح؟  
فترضى تعيش القصة بالمقلوب  
فتقول أنا نايم وهصحى  
على دكتي وسهرت جامد  
وشوية يعنى وهتيجي فسحة  
وألقاها جاية وبتقولي خالد  
صوت المنبه  
كان مستجاب  
لما دعا الحلم ما يكملش  
ورفض حضور  
كل اللي كانوا غياب  
وسابني بجرحي لجل ما أتعشمش  
قالي ما تصحى  
كل اللي جرحوا أحباب  
ومفيش صلاة في  
الحب بتنفع قضا !

## هحكيلك عني

هحكيلك عني كثير يعني  
لما أبطل فيا ألابيكي  
ما أنا كل ما أجي أفسر شئ  
بختار من سحرك في عينيك  
وأركز أكثر بصعوبة  
فألابيني شيطان مليون توبة  
معصيته جميلة ومطلوبة  
مش أكثر إنه يدوب فيكي!

## جواب

دول كتبوا شئ عن البراءة  
وزوقوه بحبة عبط  
وكل ما أحكي بصراحة  
يقولوا لأ.. اسكت غلط!  
عيل شقي بضرب زميلي  
لما جه وعمل رئيس

وألعب أنا دور الحرامي  
وهو يلعب عسكر بوليس  
وأنا كنت لابس مريلة  
وشاطر في حل الأسئلة  
أنا كنت فاكر  
إني أما أذاكر  
هخطف هوى ده العيله  
وزي كل القصص  
هتفوق على صوت الجرس  
ووقعة من فوق الفرس  
يطلع حاميهها مش فارسها  
وحراميهها من الحرس!  
وأنا اللي مش عامل حساب  
دوري إيه في القصص  
أهم شئ الجواب  
اللي فيه كلمة بحبك  
أيوة ده اللي انت لقتيه  
فجأة فوق الدرج جنبك!

## لون الطباشير

لون الطباشير  
في مدرسة كان هو البادي  
إني أبدل وياكي ألوانه  
وتفضلي ويايا لإعدادي  
بعد المدرسة  
كنت بجيلك  
وأهديك أشعار مكتوبة  
وأحكيلك فيها عن العشاق  
والبعد الي مخليني أشتاق  
وتقولي سامحني خلاص توبة  
كان وقتها لسه الحب برئ  
ما هو لسه إمبارح  
لاعب ويانا حادي بادي  
ويا الأيام ومع كل نهاية بفتكرك  
وبفتكر الواد الي كتبتك أجمل أشعار  
بفتكر اليوم الي حضنتك  
زي فراشة بتحضن في النار

وتنزل دمعته  
على حد معاكي أنا عشته  
عن حد  
قولتي لي والله أنا عشقته  
بعدها قالو هالي كثير بعدك  
في أوقات البعد وانت قصادي!

## اليوم غريب

مالي النهارده  
بنسخط تاني لعيل  
وأشبط في حاجة مش بتاعتي  
مالي النهارده  
ضحك من اللي كان قليل  
م اللي نسيني  
من زمان وفارق حكايتي  
اليوم غريب  
بيقولي ليك م الورد  
دي أجمل نصيب  
اليوم حبيب

هيسطر الباقي في حضنه  
ويكتب في كراسته بخطي !

## ولا حصة

قعدت جنبها في الديسك  
ما فهمتش ولا حصة  
القرب زادني  
بالمحبة تجلي  
وقلبي يدق أكيد حاسه  
قلمها قام طرف عيني  
وقالي بص واتوصى  
فنفخت عيني بالمنديل  
هموت لو زاد عليا الميل  
فتنفخ تاني  
خلاص طابت؟  
أقول أبدا.. أكيد لسه !

## بندور

قلوبنا شائلة في حكاية  
شنتنا فيها كتب الدين  
وبحتاج منها براية  
بيرسم شكلها قلبين  
وأستيكة بريحة ورد  
والحصه الجاية مزيكا  
وع السلم هنعضن بعض  
وأسرح ف عنيا كالعادة  
ومع إن النشيد وطني  
بحسه رومانسي بزيادة  
يعدي اليوم.. تعدي سنين  
فنهم يعني إيه يا حنين  
بندور على قلوبنا  
وعلى وردة وسط كتب الدين!

## كان أول يوم

ما سمعتش اسمي ولا لقيته  
وجريت علشان ألمحه في الكشف  
كان أول يوم فيه راح أبدل  
اسمي بأرقام بتعد لألف  
رصونا بنظام وبالترتيب  
أرقام لجلوسنا وكشوف لحضورنا  
وفوذج أوراق مطبوعة  
بتسأل أسئلة مش ممنوعة  
مش زي الأسئلة في دماغي  
ومش عارف ليه  
رغم حضوري أنا كنت بغيب!

## قسمة

في ابتدائي  
لما كنت بشوف عنيني  
وابتدائي بالسلام

ويا الكلام  
وسط حصة الحساب  
وخوفي من ضرب العصاية  
لما ضرب المسألة يطلع غلط  
طيب القسمة  
ناتجها عندك كام  
أصلي كنت  
وقت الشرح مش معايا  
وأصلي معملتش حساب  
والقسمة جت  
فبقيتي انت مش معايا!

## طريق المدرسة

لسه طريق المدرسة مليان كلاب  
وناس بتنزل حلمها تسف التراب  
وعيال بتلمح حلمها  
وناس بترفع حملها  
وحلمها على حلمها شبه السراب  
يا ألف حلم كان جميل جواها خاب

لسه طريق المدرسة مليون هموم  
وأنا كل يوم بكبر شوية جوه الهدوم  
ولسه طريق المدرسة مليون كلاب !

## سيرتك

وإزاي أنا عيشتك حلمي في يوم  
فماخليتش في حلمي من الكوابيس  
وإزاي ما فهمتش ليه الشعر  
بيخاصم سيرتك في الكراريس  
وإزاي أنا لومتك في خيانة  
والكون لو جاي على هوانا  
كان رب الكون ما خلق إبليس!

## نبلة

يا مزوقه  
ضربة النبلة بقولة أي  
في حضن حوش المدرسة  
مش حضني كان أولى

يحميكي م النبلة  
ويسمعك طيلة  
قلبي اللي بيشفوك  
فيهديكى كانتينه في الفسحة  
يا عسليات الفراولة كلها  
شفايفها ليه أطعم  
يا «حد عاوز»  
على لسان البياعين  
علموا قلبها يحلم  
فيفهم إني حبيته  
زي بقية العيال  
بس العيال سكتوا  
لكنه لما صابني بالحب  
بالنبلة والطبطبة أنا جبتة!

ولأني بليد

فبقيتي كضيف  
بتزوري عيني مع دموعها  
في ألوان الطيف

لما الذكرى تزورني يوماتي  
كلسعة برد  
أو حتى البحر ياخذني معاه  
بين جزر ومد  
والذكرى تعيشك جوايا  
في الشتا والصيف  
ولأني بليد بنساكي ساعات  
لكن برجع علشان أتمد !

قمر ١٤ يا أخويا  
«حسام»

## آخر وقت

وفي آخر وقت  
كنت بتلحق تكتب آخر إجابات  
كنت بتلحق نفسك  
قبل ما تلحق في الهم تبات  
كنت بترسم  
على وش فنجان القهوة  
وش بيضحك للي هيقراه  
وتقول بكره مليون حكايات  
ولآخر وقت كنت مصدق  
كنت بتجري  
ورا حاجة لازم تتحقق  
كنت بتعلن نصر مؤكد  
من غير ما حتى تتحقق  
وقتها كنت بتفرح جامد  
أصلك لسه مكنتش عارف  
إنك كنت في آخر الوقت

وإنك بين عقرب والتاني  
راح تتقص أحلامك منك  
ووقتها تلزم وضع ثبات !

٢٠١٦-١٠-١٦

وأهي كل حاجة سبتها  
في يوم ما سبتني وطلعت  
يحكي عليها كل من حبك  
ويحضنوني لجل أنا شبهك  
ويقولوا ليا حاجات كتير عنك  
فأتعجب إزاي مكنتش أعرفها  
وإزاي تكون الجنة في بسمتك  
وملمحش أوصافها  
وإزاي بقى أصدق ده انت هنا عايش!  
في كل حاجة لسه بعرفها  
هنام هنا مكانك الليلة ده بالذات  
وملحقتش نومة علي  
لما ماخافش الموت  
وأدعي دعا يونس وأنادي في الظلمات

وأدعي دعا ايوب وأكتم بكايا سكوت  
مش قولتلي هتفوت عليا الصبح؟  
طاب ليه بقى مافوتش؟  
عديت عليك الفجر  
وصليت عليك العصر  
ودعتنا كلنا وأنا بردو ما فهمتش  
وقالولي انك مت وبردو ما متش!

٢٠١٧-١-١

بصيت للدنيا من تحت لفوق  
ففهمت إن القصة هتخلص  
وإن الأحزان مهما بتكبر  
فجأة بتنقص  
في لقا بين خالق وبين مخلوق  
وفراق مفهوش أمل لرجوع  
بس بيحضن جواه الشوق  
شوفت إمبارح كان عامل إزاي  
طبطب على كتفي وعمل الشاي  
تعالى أحكيك عن وجعي

قام رد ببسمة خليك نساي  
محتاج أحكيلك .. فبتنزل  
وللجنة تسيبني وتطلع فوق!

٢٠١٧-٨-٢٥

هدعيلك وتدعيلي وخلي الدعا واحد  
كنا ثلاثة تعدهم تلقى العدد واحد  
بقيت انت وبعدها نقصنا من الواحد  
ربك رايدها كده فنوحد الواحد  
مستنيين نتجمع وأهو يلا حسن ختام  
سيبك من الدنيا خليك من الباقيين  
ده الدنيا قبل ما تبدأ فيها قلوب فانيين  
ترثيك دموعهم اللي ما فارقت عين  
وتقول متى نلقاك في جنة الصابرين  
ونفرح بقى بلقاك من بعد بعد حزين  
ونرسم الفرحة من وجهك البسام  
خلي الدموع لي ما نوى يفارق  
وإحنا لقانا جاي لو بعدنا سارق  
انت اللي بس لجنة كنت بتسابق

وسبقت ليها وقتنا بنعد في الأيام  
ياهارون إوعاك تتخلي عن موسى  
وإدعي يا موسى دعوتي لحسام  
«قال رب اغفر لي ولأخي وادخلنا في رحمتك وانت ارحم الراحمين»  
الأعراف الآية ١٥١

٢٠١٨-٨-٢٥

يافرحة لقاك بالهور  
فرحة بتتحنى  
ياللي انت متخبي  
وفي قلبنا استنى  
البعد شال الألم  
منك بقى فينا  
مضيت غياب في العدد  
يا أيامنا عدينا  
ويا تجمعينا بيه  
يا تجمعيه بينا  
في الجنة كل النعم  
وانت اللي أنا أتمنى

فكل عيد ميلاد  
وانت في الجنة!

٢٠١٧-١٠-١٦

الجاي بيوزع  
على الجايين قسمة ومكتوب  
والرايح بيودع دمع  
وفرح وأغاني وكلام مكتوب  
والحي أبقى من الميت  
في كلام بتقوله الناس  
صحيح لكن  
في عبر خداعة بالمقلوب  
الميت أبقى من الحي  
الظلمة تدوم لو مات الضي  
الذكرى ما بتفرقش  
ما بين ميت أو حي  
في قياس الضغط  
قال الدكتور إنه خلاص مات  
أومال ليه فاضل عندي أنا حي

ابيضت عين أمي  
وأتوها م الصلاة والصوم  
بقميص من ضي  
الذكرى بتعلن  
إنك أصغرنا وأكبرنا  
الموت اختارك فاخترنا  
ففضلت تعيش  
مالك يا حسام؟!  
بالبسة مفيش  
الوجع الزايد مبيحكيش  
بيرد ببسة  
وكأنه راضي بالقسة  
حتى إن كانت مبترضيش  
فترضى بنصيبك م البسة  
وترضى بنصيبك من أيوب!

٢٠٠٤-٩-١٥

جيت يوم ويايا  
عشان نديها صورها وهداياها

قولتلي غني  
يا تموت م الذكرى  
يا تعيش الفرح المستني  
غنيت ويايا  
كنت كأنك بتعلمني  
إننا نهايات بدايات تانية  
وإننا أموات بنعيش  
لو سلمنا لفراق تانية  
كوباية الشاي المضبوطة  
وسجايرك م العلبة الغالية  
ووقوفك جنبي  
من بعد ما كون اتجمع حواليا  
مشاويرنا كثير  
وشاورنا كثير للفرحة لجل تستنى  
طيب ليه سهتني وسبقت للجنة  
وليه سبتني أفضل عندي  
م أنا جيت وياك آخر مشوار  
ورجعت بدموعي لوحدني!

## فهرس

- سيما أونطه هاتوا قلوبنا ١  
سيما صيفي سقفا سحابة بتشتي ٦  
فيلم البحار والسبع بحار اللي ما بتبحرش ٢٢  
سيرة الولد اللي بقى شايب بره تترات الفيلم وبت الك..  
وتشينة ٢٧  
فشار بس عميق جوه البايت ٧٤  
فيما حكت دنيا ( يا سادة يا كرام ) ١٠٢  
أنا إنت وإنت أنا .. فمين بقى هيحضر حفلة ستة؟! ١٥٥  
٥٠ تذكرة سوق سودا للفيلم ١٨٣  
\*فيلم الموسم وكل موسم\* البلد اللي هتلق تعشقها في الطائرة  
٢١٤  
المجد الابتدائية المشتركة ( فيلم العيد ) ٢٤٥  
قمر ١٤ يا أخويا«حسام» ٢٦٥

استراحة قصيرة ونعود





جميع الحقوق محفوظة لدار مسار للنشر و التوزيع  
يحظر طبع أو نشر أو تصوير أو تخزين أي جزء من هذا الكتاب  
بأية وسيلة إلكترونية أو ميكانيكية أو بالتصوير أو خلاف ذلك  
إلا بإذن كتابي صريح من الناشر

01020439639